

Ol
ripot bilong
Wes Papua
na
Indonesia

pes 2

**Ol
Foren
Afeas
opisa
autim
tingting**

pes 3

Peipul i
egensim
tru
Niningi

pes 7

**Ol
nius
long
ovasis**

pes 15 - 16

I gat bilip George Wan bai kamap Madang Gavana

LYNNE MINIRU i raitim

I GAT bikpela tingting nau insait long Madang Provinsel asembli olsem memba bilong Usino Bundi, George

Wan bai kisim sia bilong wantok bilong em Jim Kas na kamap olsem Gavana bilong provins.

Planti ol pipel long Madang i laik bai Jacob Wama i mas kamap Gavana tasol disisen em ol lain long provinsel asembli i save mekim na

dispela i soim olsem planti presiden bilong ol Lokol Level Gavman (LLG) i laik bai Mista Wan i kisim sia bilong Gavana.

Wanpela man long opis bilong Gavana husat i no laik long givim nem bilong em long Wantok niuspepa

i tok memba bilong Bogia, Bernard Molok na memba bilong Midel Ramu, Tommy Tomscoll i no save go long ol miting bilong provinsel asembli na long dispela as na Provinsel Gavman i bin rausim tupela olsem asembli

I go moa long pes 3



Traim tasol

• Foodtown Warriors soka tim bilong Fiji i kamap long Mosbi long traim Osenia Soka Klap resis. Ol i bin lus 3-1 egens Solomon Allan long Tunde dispela wik. Foto: IVAN BAYAGAU.

Bung bilong kamapim nupela politikel pati bai kamap

IAN KAKARERE i raitim

WANPELA nupela politikel pati bai kamap bihain long Papua Niugini Tred Yunion Kongres (PNGTUC) i kamapim wanpela bikpela bung long pinis bilong dispela mun o mun bihain.

Jenerel Seketeri bilong PNGTUC John Paska i tok olsem kongres i bin kamapim dispela tingting bilong kamapim wanpela politikel pati long mun Ogas las yia na dispela tingting i wok long kisim planti sapot tru.

Mista Paska i tok PNGTUC i no bin holim wanpela bikpela toktok long sapotim dispela tingting tasol tasol planti manmeri i wok long singaut long telepon i kam, raitim pas i kam long olgeta hap

bilong PNG long sapotim dispela tingting.

Em i tok bikos long dispela sapot, PNGTUC bai holim dispela bung long strongim ol tingting na toktok antap long dispela nem wantaim ol polisi na lo bilong en na tokaut long wanem taim bilong opim dispela pati.

Em i tok dispela pati bai wanpela bikpela open pati tru antap long nem demokrasi we ol bung bilong pati i ken givim sans long olgeta manmeri long olgeta kain kain wok na level long autim tingting na givim ol aidia bilong ol.

Mista Paska i tok dispela pati bai i namba wan pati we i tru demokretik na i makim pati, na bai i sut long kalsa, politiks, rijon na sosel eria bilong PNG stret.

Em i tok dispela pati bai i no inap kam aninit long

wanpela man husat bai papa long en olsem planti pati we i stap tude.

Mista Paska i tok as bilong kamapim dispela pati em bikos long ol planti kros ol manmeri i gat ol politikel pati tude. Tasol em i tokaut olsem PNGTUC bai wok strong yet long sanap wantaim ol memba bilong em long yunion.

Mista Paska i tok PNGTUC bai wok klostu wantaim long ol wok we i gat gutpela helpim long ol pipel na bai i egensim ol wok we ino inap sevim ol pipel.

Mista Paska i tok pasin bilong paul na stilim ol samting insait long ol bikpela opis i bikpela long PNG na PNGTUC i askim olgeta manmeri long sapot wantaim long wanem rot we i ken kamap long salim ol lain husat i save mekim ol dispela stil pasin long kisim mekimsave bilong lo.

Nestlé MILO IKEN WOKIM GUTPELA SAMTING LONG YU

Hevi bilong Wes Papua i no liklik hevi, Yaru i tok

Pot Mosbi:

• Plis i tok ol sekuriti gad bilong wanpela haus long Touaguba Hil i painim bodi bilong wanpela man husat ol i bilip i bin traim long stil long haus ya tasol aburus na em i dai.

PLis i ni save wanem as na man i dai tasol ol i ting man ya i mas dringim planti bia bipo long em i kalap long banis i go insait long eria bilong dispela haus bilong wanpela koporet fem o kampani.

Plis i tok dai man ya i nogat ol mak long bodi bilong we i soim olsem em i bin painim birua. Ol plis i painim wanpela kep long het bilong man ya we i tok "Strenja" long blekpela ink bairo na ol samting olsem soket na het bilong skru draiva, wanpela pins ba na tupela plaia insait long beg we i pas yet long baksait bilong man taim em i dai.

Ol wokman bilong ambulens i rausim dai man na kisim em i go long bikpela hausik.

NCD/Sentrel Komanda na asisten komina, Tom Kulunga i tok ol samting olsem tos na ol narapela samting ol i painim long bodi bilong man i soim olsem man ya i wanpela stil man.

Long sampela wik i go pinis Mista Kulunga i bin givim tok lukaut long ol manmeri bilong siti long lukautim ol yet gut long nait bikos planti ol stilman i wok long raun na brukim ol haus na go insait.

• Ol plis long Boroko i wok long painaut long dispela stil pasin i bin kamap long Boroko Post Opis we ol bikman bilong plis i bilip olsem sampela lain husat i wok insait long Post Opis i gat save long dispela stil pasin. Stil pasin i bin kamap long Sarere na ol plis i wok long toktok wantaim ol bikman bilong Post Opis yet.

Plis i tok i nogat sain olsem ol stilman i brukim bilding na go insait na tu ol i no kisim wanpela mani tasol sampela bilong ol pas ol i bin rejisterim i no stap.

Rabaul.

• Provinsel plis komanda, Ephraim Tomonmon i askim ol tripela ol raskol man husat i bin ronawe long Kokopo sel las wik long kam bek long sel. Em i bir mekim dispela toktok taim plis i holim pasim foapela bilong ol man ya.

Ol raskol lain ya i bin kalapim wanpela long banis na ronawe na plis i wok yet long painaut long wanem as na ol man i bin ronawe.

Sikspela bilong ol i wok long ronawe long plis yet na plis komanda i tok ol plis i save ol dispela man i stap long wanem hap olsem na plis i laikim ol yet i mas kam na givim ol yet long plis.

• Tripela yangpela meri i bin painim birua taim wanpela PMV bas i bin bamim ol. Wanpela bilong ol tripela ya i dai na tupela i kisim bagarap tasol. Mista Tomonmon i tok ol tripela i bin go swim na i bin go bek long haus taim ol i painim dispela birua. Bas bamim ol tripela yangpela ya i bilong wanpela biknem bisnisman long provins. Yangpela dai i gat 13 krismas na em i bilong Malaguna vilis.

WINIS MAP i raitim

WANPELA Wes Papua non gavman mausman i singaut long Australia na Papua Niugini long skelim gut dispela hevi i stap long kantri bilong ol.

Sem Yaru, kodineta bilong wanpela lokol humen raits grup long Jayapura long Indonesia ol ikoli HAM (Hak Asasi West Papua) i tok tingting bilong Australia na Papua Niugini long ting olsem hevi bilong Wes Papua na Indonesia em insait hevi bilong ol yet, em i no stret.

Mista Yaru i tokim dispela pepa long Jayapura wanpela wik i go pinis olsem ol ami na plisman bilong Indonesia i bin bagarapim tru planti manmeri bilong Wes Papua moa long 30 krismas olgeta i kam nau. Em i sut long pasin bilong paitim na kilim man.

Mista Yaru i tok planti tausen Wes Irian (Wes Papua) i bin kisim bikpela bikpela bagarap long bodi na skin na planti i dai bikos long eksen bilong ol Indonesia ami na plisman we abrus long kisim ol OPM paitman, ol i mekim nabaut long ol gut-

pela manmeri.

Em i tok mak bilong brukim tru humen raits lo o gutpela sindaun bilong ol pipel i bagarap olgeta long oda bilong Jakarta long salim ol sekuriti fos bilong en. Na dispela i mas kisim luksave na tingting bilong ol narapela kantri. Olsem na PNG na Australia i noken giaman na tok dispela em liklik hevi we Indonesia yet i ken stretim bhainim lo bilong em, Misa Yaru i tok.

Em i autim bel hevi tu long toktok bilong Foren Afeas Minista bilong Australia Alexander Downer olsem kantri bilong em bai i no inap sapot long Wes Papua long dispela independens pait bilong ol.

Mista Yaru i tok hevi bilong ol i narakain olgeta bikos moa blut bai lus sapos hevi bilong Wes Papua i stap long han bilong Indonesia long stretim.

Em i tok sapos PNG, Australia o ol arapela intanesenel grup olsem Yunaitet Nesen i givim sapot bilong ol, bai sampela isipela rot i ken kamap na rot i ken op tu long independens.

Em i tok sapos ol toktok egens i kam long ausait long pasin bilong Indonesia,

bai sampela gutpela samting i ken kamap. Indonesia i ken senisim tingting bilong em long Wes Papua sapos moa komplek ol toktok egens i kam long ol arapela kantri.

Mista Yaru i tok bai i gat planti birua namel long ol lain Melanesian bilong Wes Papua na ol lain Java husat i kam stap na wok long trensmaigresen kem. Em i tok ol dispela lain Java husat i bin dai klostu long Wutung boda i soim dispela piksa. Ol dispela lain Java i bin go wok wantaim wanpela timba kampani long hap. Em i tok ol turangu gutpela lain bilong Java bai bungim birua long han bilong ol OPM paitman long bekim bek ol eksen bilong Indonesia ami na plisman.

Em i tok ol Indonesia ami na plisman i save tanim bek na autim belhat bilong ol long ol gutpela manmeri taim ol i no holim ol OPM paitman. Dispela i save mekim ol lida bilong OPM i kros na ol i save bekim bek long ol lain Java pipel.

Mi nogat kros long ol Java pipel i raun na mekim wok na bisnis long laik bilong ol long hia. Dispela em fridom bilong ol, Mista Yaru i tok.



• Sampela ami na plis bilong Indonesia husat i stap long Mindiptana long Wes Papua. Tupela soldia i bilong Wes Papua wantaim wanpela plis opisa husat tu i wanpela Wes Papua man. Narapela plisman em bilong ples Java insait long Indonesia yet. Nem bilong em Suharto tasol em i no wantok bilong olpela presiden. Wanpela nius ripota bilong Papua Niugini i sanap wantaim ol. Dispela em long taim ol 89 refuji long Is Awin kem long Kiunga i go bek long Wes Papua. Ol refuji i go bek long laik bilong ol yet. Mindiptana i stap 90 kilomita longwe long Kiunga. Ol refuji i go bek long balus. Foto: IAN KAKARERE.

Katres kisim lek bilong man PNG

IAN KAKARERE i raitim

OL Indonesia plisman i bin sut long sotgan long bikpela grup Wes Papua manmeri long Merauke taun las mun na wanpela Papua Niugini man i kisim bagarap long lek bilong em.

Long las mun wanpela nius ripot i bin kamap olsem wanpela man bilong ples Boset long Westen provins i bin dai long sotgan taim ol Indonesia plisman i traim long brukim bikpela grup bilong ol Wes Papua lain taim ol i bin go apim plak bilong ol long Merauke long Desemba 1, 1000. 7-pela lain i bin dai.

Wapela Boset man husat i save stap long Mosbi i tokaut long dispela wik olsem kandre bilong em, Paschalis Gabem i bin

kisim bagarap long lek bilong em taim em i bin stap long dispela hap na ol plisman i sut long sotgan.

Bikman ya i tok lek bilong Gabem i wok long go orait nau na em i kam bek long pinis long ples Boset.

Bikman ya i tok Gabem i bin go long Merauke long Wes Papua long baim ol samting long taim bilong Krismas. Gabem i wankain olsem olgeta lain bilong ples Boset na ol arapela ples klostu husat i gat tok orait long kalapim boda na i go long hap sait long baim ol samting long taun bikos Merauke taun i stap klostu moa long ol. Daru na Kiunga taun i longwe tumas na kos bilong ol samting long hap sait i daun moa long PNG.

Bikpela kandre bilong Gabem i tok Gabem i bin stap long rong hap long rong

taim, taim dispela hevi i kamap.

Long dispela taim tu ol sampela Wes Papua manmeri husat i bin kalapim boda na i kam stap long Weam long Westen provins i bin go bek pinis long Wes Papua. Namba olsem 31 lain i bin kalapim boda i kam long Weam long Desemba 1 bihain tasol long birua i bin kamap long Merauke. Desemba 1 em de ol Wes Papua i makim long amamasim independens bilong ol we ol i kisim long 1961.

I gat narapela grup bilong ol Wes Papua lain husat tu i brukim boda na i kam long hapsait bilong PNG. Ol i stap long Bula long Westen provins. Sindaun bilong ol dispela lain em nogat inap ripot i kam long ol yet. Narapela grup em ol i bin kamap long Westen provins klostu long Kiunga long Krismas taim long pilai spot wantai mol asples long boda.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea



Publishing Weekly, Thursday, for
Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief: Anna Solomon.
Acting Advertising Manager: Jocko Oberleutter
Editor of Wantok: Yakam Kelo

Papers distributed by air throughout PNG. Available by air mail subscription within Papua New Guinea and overseas.
Email address: word@global.net.pg

Advertising deadlines: Display bookings, Tuesday midday. Camera ready copy, Wednesday midday. Classified Advertising, Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

2001 baset bilong WNBPN i gat planti sans

LYNNE MINIRU i raitim

BASET bilong Wes Nu Briten Provins long yia 2001 i no bilong stretim laik na wari bilong ol liklik eria tasol em i bilong ol pipel long luksave na skelim wok Provinsel Gavman i save mekim long bringim ol sevis i go long ol.

Gavana bilong WNBPN, Clement Nakmai i mekim dispela toktok taim em i toktok wantaim ol niusmanmeri long baset bilong provins bilong em we Nesanel Gavman i bin tok orait pinis long las yia.

Baset bilong 2001 em K43,361,300 na insait long dispela em K29,469,300 i bin kam long Nesanel Gavman olsem gren i go long WNBPN na K13,892,000 i bin kam long provinsel gavman.

Mista Nakmai i tok Nesanel Gavman i no givim K30 milien bilong provins yet na em i toktok wantaim Praim Minista Sir Mekere Morauta pinis long dispela.

Gavana Nakmai i tok ol i ting bai ol i kisim K60 milien tasol nogat na em i hariapim Gavman

pinis long givim dispela mani bilong ol. Em i tok baset bilong 2001 i gat K5 milien moa long baset bilong 2000.

Mista Nakmai i laikim olgeta pipel long provins bilong em long amamas olsem baset bilong 2001 em i bikpela na ol pipel i no ken kros olsem mani i liklik.

Em i tok provins i gat dispela problem we i nogat gutpela menesmen bilong mani insait long provins na em i mekim plen pinis long stretim dispela hevi.

Gavana Nakmai i kolim provins bilong em olsem wanpela sip M.V WNBPN tasol em i tok sip i nogat wanpela gutpela lida na kepten long kisim sip i go long ples we olgeta pipel i laikim.

Em i tok insait long faivpela yia bai em i stretim kompas bilong sip long mekim sip i ron gut we ol pipel bai i no inap stap hangere o sot long wanpela samting.

Gavana i tok provins i gat sans long stretim ol rong bilong bipo na kamapim nupela rot na baset bilong 2001 i givim dispela sans.


Baset bilong 2001 bai lukluk long stretim yet helt, eduksen, infrastraksa o ol samting olsem rot na bris, ekonomi na lo na oda.

Long sait bilong planim ol kes krop o ol samting bilong mekim mani olsem kokonas, kaokao na kopi, Gavana i tok WNBPN i kamap olsem namba tri insait long kantri long dispela taim na em laik stretim dispela insait long tripela yia na mekim provins bilong em i kamap nambawan.

Mista Nakmai i tok taim em i kamap olsem Gavana bilong provins, nambawan samting em i bin mekim em long mekim ol pipel i mas gat bilip long edministresen bilong em, kamapim strongpela lo we bai i gat kontrol long mani na menesmen, kamapim senis insait long ol bod ov menesmen na bildim wanpela nupela tim.

Em i tok ol pipel bilong WNBPN i gat sans nau long kamap olsem patna insait long developmen na dispela bai kamap wantaim wanpela plen sistem we bai bungim ol plen bilong ol lokal level gavman i go insait long distrik plen na ol dispela plen bai ol i bungim insait long bikpela plen bilong provin-sel gavman.

Baset bilong 2001 bai stretim rot bilong ol dispela plen long kamap insait long provins.



• Gavana bilong Wes Nu Briten provins Clement Nakmai (lephan) i mekim toktok long 2001 baset bilong provins bilong em. Sindaun klostu long kamera em nambawan seketeri bilong em Philip Korane. 2001 baset bilong WNBPN em Prime Minista Sir Mekere Morauta i bin tok orait pinis long en las yia, 2000. Foto: IVAN BAYAGAU.

Somare tok em i no singaut long Palamen i bung gen

LIDA bilong Nesanel Alaiens Pati (NA) Sir Michael Somare i tokaut olsem ripot we i tok olsem em i laik singaut palamen long kam bek bung gen, em i no tru.

Sir Michael Somare i tok em i no bin singaut long palamen i mas kam bek bung gen na tu em i no save long ol 60 memba i sapotim dispela laik bilong em.

Sir Michael i tok ol dispela ripot i no tru na i mekim ol manmeri bai i ting olsem em i man bilong hangre long pawa. Na tu dispela ripot inap mekim ol manmeri i ting em i laik bekim bek long pasin Gavman i bin mekim long rausim em long wok Minista em i bin

holim i kam inap long Desemba las yia.

Sir Michael Somare i tokaut tu olsem em i no ting em i brukim wanpela lo long makim Barney Rongap long kamap eking seketeri bilong Foren Afeas dipatmen. Sir Michael Somare i bin rausim (saspenim) olpela seketeri Evoa Lalatute long wok bilong em na makim Barney Rongap olsem eking seketeri.

Sir Michael Somare i tok em i ting dispela eksen bilong em i no abrusim wanpela mak na em i askim Atoni Jenerel long tokaut tu long dispela. Atoni Jenerel em man i go pas long olgeta gavman loya na lo dipatmen bilong gavman insait long kantri.

Foren Afeas i laik stretim nem bilong opis

YAKAM KELO i raitim

BIHAIN long opis bilong Foren Afeas dipatmen i gat bikpela ripot nogut i kamap long ol pinis, long las wik olgeta woklain i laik stretim dispela hevi na wok gut wantaim na sevim kantri.

Insait long wanpela bikpela bung bilong olgeta woklain, eking seketeri bilong dipatmen Leonard Louma i askim olgeta wokmanmeri long lusim bel kros na ol tingting nogut egensim narapela na wok bung wantaim gen.

Mista Louma i mekim dispela toktok bihain long dipatmen i bin gat ripot' nogut long ol hait pasin we i kamap long paspot bilong ol ovasis lain na tu ol eksen we i bin kamap taim ol Foren Afeas opisa i go

na rausim na kalabusim sampela Saina bisnis lain husat i bin kam long PNG long las mun.

Insait long ol toktok bilong stretim hevi, ol opisa i tok dipatmen i mas muvim ol opisa raun long wanwan opis bihain long ol i wok sampela krismas pinis. Na ol i no ken stap longpela taim long wanpela opis tasol. Ol i askim tu long i mas gat wanpela wok painimaut (komisin ov enkware) i mas kamap long dipatmen long sekim olgeta dispela ripot nogut na painimaut husat ol opisa i save mekim wok hait long hevi bilong paspot.

Ol opisa i bin askim planti kwesten na autim planti bel hevi na tingting long ol rot we ol inap kamapim long daunim na stretim sampela hevi we i bin kamap pinis.

Eking seketeri Mista Louma i tokaut olsem nogat wanpela wokman o wokmeri bai kisim taim o hevi long ol toktok ol i mekim o autim long dispela bung. Dispela bung em bilong olgeta manmeri i mas autim ol toktok na wari bilong ol.

Mista Louma i tok em i save olsem sampela bikpela rekot i bin raus pinis long kompyuta masin taim em i bin sekim. Sampela olpela fail na ol bikpela rekot i no moa stap long kompyuta na em i save sampela lain i mas rausim.

Tasol em i bai kisim ol woklain bilong NIO (Nesanel Investigativ Opisa) i kam na sekim dispela hevi na tokaut long husat i asua long ol dispela hevi.

Mista Louma i askim olgeta opisa tu long

harim tok na wok gut wantaim ol plisman husat bai i kam long kisim ol stori na ripot long ol hevi i kamap pinis long opis. Em i askim olgeta opisa long tokaut tru toktok na wanel wantaim na givim tru ripot i go long ol plisman.

Em i tokim ol long larim ol plisman i mekim wok painimaut bilong ol gut na wanpela samting i no ken stapim ol plisman long sekim ol rekot na ol pepa na askim ol kwesten long ol opisa wanwan.

Nius bilong Foren Afeas dipatmen i bin kamap bikpela na i daunim tru nem bilong dipatmen. Gavman i rausim tu ol bosman bilong dipatmen bihainim ol dispela hevi bilong paspot na ol Saina lain we ol opisa i kalabusim na rausim ol long las mun.

I gat bilip George Wan bai kamap Madang Gavana

I kam long pes 1

memba.

Madang Provins i gat 16 lokal level gavman na Bogia na Midel Ramu i no memba bilong provin-sel asembli moa olsem na ol arapela 14 LLG i pasim tok pinis long makim Mista Wan long kamap Gavana.

Nau yet i gat tripela politikel kem i stap long Madang we Oposisen lida, Bill Skate na namba tu bilong em, Peter Peipul i stap insait long dispela kem.

Ol tripela kem em bilong Mathew Gubag, Jacob Wama na George Wan.

Man ya i tok em i no save wanem as na Mista Skate na Mista Peipul i stap insait long dispela kem bikos kem i bilong ol lida bilong Madang yet na i no bilong ol nesanel memba bilong Palamen.

Ol presiden bilong 14 LLG i laikim Mista Wan bikos em i gat save pinis long wok Gavana na tu em i man bilong bus na narapela em Jim Kas na George Wan i gat wankain tingting o luksave long mekim ol samting.

Em i tok planti toktok i bin kamap olsem ol 14 presiden bilong LLG i les long ol man bilong nambis bikos longpela taim stret em ol lain long nambis i

holim ol bikpela wok insait long provins.

Nau em bai taim bilong ol busman long holim pawa na ronim provins olsem na ol i ting George Wan em i gutpela kendidet long dispela wok Gavana.

Eking Gavana, Pengau Nengo i no givim yet toksave pepa long wanem taim bai ol i holim miting long makim nupela Gavana.

Madang Provin-sel Asembli i bin tokaut pinis olsem ol bai makim Gavana long Trinde tasol i luk olsem nogat na ating bai ol i makim Gavana long Fonde o long tomoro.

Em i tok ol i no laik kamapim gen wankain pasin olsem provin-sel gavman bilong Sentrel na Milen Be i bin mekim we ol i bin go long kot na westim planti taim na mani.


Em i tok ol sampela samting i no stret long ai bilong Ogenik Lo na kot insait long Madang olsem na sapos ol i makim Gavana, bai Madang i gat Gavana na sapos ol i no makim bai Madang i stap olsem nau em i stap.

Ol wokmanmeri long het kwata bilong Provin-sel Gavman na long Madang taun i wok long wet tasol long husat bai kamap Gavana bilong ol.





NIUGINI AILAN NIUS



Lukautim gut ol sevis telepon masin

OL PIPEL insait long ol ruel eria long Wes Nu Briten husat i kisim telipon sevis long dispela wik aninit long Ruel Telikomyunikesen program bilong Gavana Clement Nakmai i kisim askim long lukautim gut ol masin i stap nau long ples bilong ol.

Michael Turkia em wanpela opisa long opis bilong Gavana Clement Nakmai taim em i wokim tes telipon kol i go long ples Garu bihain tasol Telikom i putim sevis i bin tokim kaunsila long ples olsem ol masin i bilong ol pipel na wok i stap nau long han bilong ol long lukautim ol (masin) gut. Na yusim long kisim gutpela sosel na ikonomik benefit long en.

Kaunsila husat i bin kisim telipon na ansarim Mista Turkia i makim maus bilong ol pipel na tokim opis bilong gavana olsem ol pipel i amamas long dispela sevis na ol i tok tenkyu i go long gavman bilong Mista Nakmai long makim Garu viles olsem eria long putim dispela sevis long en.

Em bin tok sevis ya bai helpim planti pipel long eria long sait bilong singautim ambalens taim ol medikel imejensi i kamap, long helpim ol plis taim ol hevi long lo na oda i kamap na

tu long ol arapela samting we i nidim helpim bilong telipon sevis.

Long wankain taim, Mista Eliuda bilong Kimbe Telikom brans i bin putim wanpela telipon sevis i go long Buludawa na bihain skruim i go long ples Makiri ong Bali na Paruru long Vitu Ailan.

Ol bai skruim wankain sevis i go tu long ples Valupai long Talasea, Aiboki long Kove/Kaliai na Kilenge long Glosta Lokol Level gavamn eria.

Ol arapela ples long provins we ol i makim ol long putim dispela ruel telipon sevis long en em ol bai kisim sevis long taim yet bilong ol.

Dispela sevis em i stap long plen bilong Gavana Nakmai na i kam aninit long Ruel Telikomyunikesen program na nau em i wok long go het.

Namba wan hap long dispela program i bin kamap las wik Fraide taim ol i putim sevis ya long ples Garu insait long Talasea LLG.

Ol ples lain i amamas stret long lukim olsem wanpela long ol samting we Gavana Nakmai i bin promisim ol pipel bilong em long ileksen kempeln i wok long karim kaikai nau.

Gavana Nakmai askim ol Talasea pipel long strongim pasin tumbuna

ASKIM i go long ol Talasea pipel long luksave na holim strong long ol pasin kastam bikos dispela em as bilong lainim ol gutpela skul na save.

Gavana Clement Nakmai i bin tromoim dispela askim long ol Talasea pipel insait long wanpela seremoni bilong kamapim bel isi na sekan pasin namel long ol pipel bilong ples Ganaboku na Nrunegeru long Talasea eria las Sande.

Pis seremoni ya em ol bin holim long ples Naarenegeru long stretim wanpela hevi we i bin kamap namel long ol foapela mun i go pinis

Pait namel long tupela grup i bin mekim na planti wanpela long long grup ya i bin kisim bagarap na kisim marasin long hausik, ol bin bagarapim ol gaden kaikai na ol diwai kes krop na tu rot long Kimbe i go long ol ples ya i bin pas na i bin hat long kisim sevis.

Tasol ol bikman bilong ol ples yet long tupela grup i bin toktok wantaim na kamap wantaim ol gutpela rot long stretim ol samting na seremoni bilong we ol bin

holim long Krismas wik em bilong kamapim bek na skruim dispela gutpela sindaun.

Seremoni i bin stat wantaim wanpela sios sevis we pater Aloysius Tailo bilong Bitokara Katolik peris i bin go pas long en.

Wanpela long ol samting we i bin kamap long sait bilong bihainim pasin tumbuna em long tupela sait i tromoim ol supia long namel bilong sios long soim olsem hevi na belkros na pait namel long tupela sait i pinis na gutpela sindaun nau i kamap.

Gavana Nakmai luksave long pasin kastam olsem em i bikpela samting na em i gat ol gutpela skul long staim ol manmeri na pikinini long gutpela rot long mekim ol i kamap olsem ol gutpela manmeri long komyuniti na sosaiti, i bin tokim ol pipel long dispela seremoni olsem ol pipel i mas kirapim bek ol pasin tumbuna hausboi o haus bilong ol man.

Dispela em haus we ol yangpela na bikpela man i save bung long toktok long ol samting i kamap insait long komyuniti, na sosaiti. Na tu long sea namel

long ol yet na long ol yangpela i kisim ol gutpela skul na tok stia long ol bikpela man, ol sief na ol komyuniti lida.

Gavana Nakmai i tok long pasin kastam, haus boi ya em i bikpela samting we ol i save lukluk long en olsem ples we i gat pawa long lukautim ol man na komyuniti i save gat bikpela luksave long en.

Em i tok bikos nau i no moa gat ol hausboi, planti ol kain sosel hevi na trabel bilong lo na oda insait long Talasea na provins i wok long kamap.

Insait na olsem hap bilong seremoni, ol meri long tuipepa sait i wok long krai.

Gavana Nakmai i bin tokim ol pipel olsem bikos ol pipel yet i kamapim dispela hevi, ol yet i mas stretim.

Em bin tok pasin we ol atoriti olsem ol plis i go insait long wok bilong stretim hevi i mekim hevi i go nogut tasol bikos dispela i no lo na oda hevi. Na em bin pasin kastam long helpim stretim dispela kain hevi.

WANTOK NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
PNG	K 68.00
Ostrelia na Nu Silan	US\$46.00
Esia Pasifik na Japan	US\$55.00
Amerika na Yurop	US\$95.00

Kimbe plis bos amamas long pablik na ol woklain long gutpela Krismas na Nu Yia

PROVINSEL Plis Komanda long Kimbe Inspekta Tom Uapipi i tok tenkyu long ol manmeri insait long Kimbe taun bilong stap gut insait long banis bilong ol long amamasim Krismas na Nu Yia na olsem ples i bin stap gut long dispela taim bilong selebresen.

Long wankain tu, em i skruim tok tenkyu i go long ol plis manmeri long lukautim gut ples na pablik long Kimbe taun i bin go

long ol lotu bilong Krismas na Nu Yia we i bin kamap long nait.

Provins i bin tambu long salim ol strongpela dring long dispela taim. Olgeta ol dispela samting i bin helpim long daunim tru ol hevi we i save kamap long rot na ol arapela moa taim ol man i dringim ol strongpela dring.

Long amamasim, makim na luksave long dispela tupela bikpela de, ol pipel i

bin go long ol sios sevis, holim ol famili bung na wokim ol kaikai na danis.

Ol haus lotu long taun i bin pulap gut tru long ol sios sevis we i bin kamap long Krismas biknait, Sande nait. I bin gat ol naispela Krismas Kerol singsing na gutpela nek bilong ol singsing ya i bin pairap gut tru long bikpela nait taim ol plis i skruim "OPeresen Brait Sta" long dispela taim.



Tupela raskol long Kimbe i dai long Krismas na Nu Yia taim

KIMBE hetkota bilong Wes Nu Briten i bin gat gutpela Krismas na Nu Yia tasol wanpela samting em tupela raskol i bin dai bihain long wanpela sutaut wantaim plis.

Ol ai witness i tok wanpela raskol ya i bin banisim na kisim ka na yusim long ronawe long en taim samting ol bin laik wokim i no kamap orait olsem ol i plenim long en.

Ol plis husat i wok long karimaut Krismas na Nu Yia operesen i bin kisim toksave long dispela raskol grup na long samting olsem 11 kilok las Fraide, ol plisman i ronimstii ka na sutim long gan i go i kam wantaim ol plisman na ol raskol.

Taim ol raskol i luksave olsem plis i sut long ol, ol i sut bek na long sutaut tupela bilong ol (raskol) i dai na pundaun i kam aut long ka.

Dispela i kamap klostu long get bilong Kimbe Haus sile.


Plis i bin kisim narapela memba bilong dispela raskol grup long kwestenim em na nau yet i stap long rungat.

Kimbe plis i no autim yet nem bilong dispela tupela bikhet man ol bin sutim dai.


Insait long wanpela mun, tripela raskol long Kimbe i dai bihain long sutaut wantaim plis.

Tripela wik i go pinis, ol plis i bin sutim dai wanpela raskol bihain long grup bilong em i holimap Pasifik Industri Koka Kola depo na stiiim bikpela hap mani long en.

Long dispela taim, plis i bin ronim ol dispela bikhet lain husat i bin ronawe i go olsem long ples Ruango ausait long Kimbe taun na insait long wanpela sutaut namel long ol na ol raskol, ol bin kilim dai wanpela raskol long dispela taim bilong gan pait namel long ol raskol na plisman.



SEPIK NUIS



Tingting bilong singautim bek ol olupela kiap

FELIX RAMRAM i raltim

GAT wanpela tingting ol bikman long Provisel Afeas Dipatmen i wok long lukluk na skelim, em long singautim bek ol olupela kiap na givim wok long ol.

Dispela i wanpela long ol arapela samting em dipatmen i gat tingting long kamapim insait long Sandaun bihain long nupela Edministreta i kisim opis long Vanimo i no long taim nau.

Ripot i tok olsem as Sandaun i stap beksait tru long olgeta kain wok developmen, em bikos i nogat ol gutpela wokman bilong gavman olsem ol kiap i stap insait long ol ruel distrik bilong provins. Em bikos

long dispela as ol i tingting long singautim bek dispela kiap sistem na putim bek insait long Sandaun provins.

Wanpela opisa bilong Dipatmen long Pot Mosbi husat i no laik mipela i autim nem bilong en i tokim Wantok olsem husat ol kiap nau i holim ol arapela wok, bai ol i givim sans long ol long aplai na kisim wok olsem ol kiap insait long ol liklik distrik insait long Sandaun. Em i go het na i tokaut tu olsem ol lain kiap husat long ol i kisim transe pinis aninit long sistem nau i stap long provins.

Ol olupela wokman bilong gavman na ol lapun bilong ples we Wantok i kisim tingting bilong ol long dispela mov. Planti long ol i givim bikipela sapot tru long sin-

gautim bek kiap sistem na putim insait long Sandaun. Ol i tok dispela sistem i bin gat bikipela rispek tru insait long komyuniti bipo. Em bai i wanpela gutpela samting long lukim dispela sistem bilong kiap i mas kam bek long provins.

Samuel Tasiu i tokim Wantok olsem bipo taim kiap i givim wanpela oda, dispela oda i go daun olgeta long pipel. Na dispela i bin save wok gut tru we i gat rispek na lo na oda insait long ol komyuniti insait long kantri. Tasol nau dispela rispek long lo na oda na tu long gavman i no moa stap. Na sapos dispela i kamap tru insait long Sandaun, bai i wanpela samting bilong amamas long en.

Sandaun pipel laik save long as bilong senisim edministreta

PLANTI toktok i sut i go i kam long biktaun bilong Sandaun, Vanimo, long ol i laik save wanem rong tru edministreta bilong provins i mekim na gavman i rausim em long opis. Disisen bilong Mista Kaman Nataleo long lusim wok bilong em olsem Sandaun edministreta em NBC i mekim las wik.

Ol ripot Wantok i kisim i tokaut olsem planti i no amamas tumas long disisen bilong kamapim dispela senis. Na ol i sutim tok long wok politik bilong wanpela politikel grup. Ol ripot i tok olsem, "dispela mov em bilong sevim tasol nek bilong wanpela politisen long taim bilong 2002 Nesenek lekken."

Wanpela sinia publik sevian long dipatmen bilong Sandaun i tokim Wantok olsem ai bilong ol politikal lida bilong Sandaun i pas long wanem ol gutpela wok olupela edministreta bilong nau i mekim insait long tupela krismas em i stap insait long provins. Na dispela mov i sanap long pinisim Mista Nataleo i wanpela bikipela asua tru ol politisen bilong Sandaun i mekim.

"Na mi laik mekim dispela tok lukaut olsem. Provis bilong yumi long tupela krismas i go pinis i stap long gutpela han. Ol kain mak o braiberi bilong wanpela lain ovasis i bikipela tru insait long Provis, na bikos ol i no inap long kisim wanem samting ol i

laikim. Ol nau i amamas bikos politiks bilong Sandaun nau i ron long bihainim laik bilong ol.

Mi laik tok olsem, wankain lain husat i putim nupela edministreta, dispela politisen na ol lain grup bilong na bai i rausim ol bihain long 2002 Nesenek lekken o klostu long taim bilong ileksen.

Pabliksevan ya husat i no laik autim nem bilong en taol ol salens long kisim Nataleo long go aut long pablik na tokaut wanem samting i no tru bilong rausim em olsem Edministreta bilong Sandaun. Em tu i mas tokaut long wanem samting em i save long wok braiberi i wok long kamap nau insait long Vanimo.

Ol arapela lain pabliksevan i givim tingting bilong ol olsem, ol i save gut tu long nupela Sandaun Edministreta Mista Gu Macius Ikoiridin. Na ol bai i amamas long wok wantaim em olsem ol i bin mekim wantaim olupela Edministresen Mista Nataleo.

Tasol ol i kwestenim gen olsem wanem taim na hamaspela krismas Sandaun bai i wet long kisim "pemenent" edministreta long gutpela developmen kamap insait long provins. "Mipela ol wokman i sik na tait pinis long politiks i wok long brukim mipela. Ol lain nau i stap long pawa i lain i save tru long paul wok bilong politik.

Skul siaman askim long rekot bilong Aitape Tsunami mani

AITAPE Tsunami pipel i tokaut olsem ol samting i wok long kamap ples klia nau long pasin na rot ol lain husat i go pas long mekim wok bilong helpim sindaun bilong tsunami pipel i no yusim gut mani. Ol i singautim bikipela wok painimaut i mas kamap long pasin na rot PNG Gavman, ol ejensi wantaim tu Aitape Katolik Misin, rot ol i yusim wol donesen mani em ol i bilip i moa long K2 milien o K3 milien.

Ripot i tok olsem i tru ol helpim ol dispela lain ejensi i givim i go long ol

tsunami pipel i gutpela. Tasol ol dispela helpim i go hariap tumas na planti samting we pipel i laikim bai i stap longpela taim i bagarap. Na ol hap we i mas gat mentenens wok i kamap, ol atoriti wantaim tu Katolik kisim i tok mani bilong Aitape Tsunami akaun i pinis.

Komyuniti lida bilong Tales na Lampu pipel husat tu i siaman bilong Areki Komyuniti Skul, Malol, Francis Namba i tokim Wantok olsem bikipela wok bilong givim sevis i go long

pipel tru long Edukesen na Helt, wok i mas go het liklik long sampela taim.

Tasol ol wok i slo daun na stap olgeta we i givim gen hevi long ol pipel na planti yangpela manki man na meri long skul. "Ol Gret 5 i no inap spelim CROCODILE na dispela i soim olsem wok bilong skulim i soim dispela tingting pret.

"Toktok bilong nogat mani moa i stap long Aitape Tsunami Akaun - mipela i painim hat tru long bilipim. Mipela tu i save

olsem, bihain long olgeta wok bilong helpim mipela, planti donesen mani i wok long kam insait yet long kantri long nem bilong Aitape Tsunami ol ovasis grup i salim i kam.

Olsem na mipela i askim ol dispela mani kam na go stap long wanem akaun na akaun i stap long lukaut bilong husat", Mista Namba i tokaut.

Mista Namba i go het na i tok: "Mipela olgeta tsunami pipel i gat strongpela laik tru long lukim olsem i gat wanpela investisesen i kamap.

Vanimo Grin memba i no amamas long pipel i no kisim sevis

MEMBA bilong Vanimo Grin na Vais Minista bilong Tred na Industri Micah Wes i tokaut olsem em i no amamas, bikos gavman sevis i no go daun tru long ol grasrut pipel. Ol gavman opisa i holim pas tumas ol pepa wok bilong ol projek na ol wok mentenens we i mas kamap pinis long taim.

Micah Wes i tokaut olsem maski em i traim hat tru long pait na kisim mani na bringim long ilektoret bilong em. Planti long ol dispela mani i save go long ol developmen we i kisim pinis tokorait. Ol mani ya i slip nating i stap long Distrik Treseri long Vanimo long las 3-pela krismas.

"Dispela em namba tri yia mi stap insait long palamen olsem wanpela memba. Maski mi pait hat tru na mi kisim pinis planti tausien kina long kamapim ol developmen, bikipela tru insait long ruel eria.

Olgeta hat wok lusim long gutpela bilong pipel bilong mi i lus nating. Ol gavman opisa i pundaun tru long

pepa wok bilong ol long sapatim mi long lukim olsem olgeta projek wok i go het pinis, tasol dispela i no bin kamap.

"Mi laik lukim olsem wanem disisen mipela i mekim pinis mas harim bai bihainim tingting bilong Distrik Menesmen Tim. Tasol dispela i no bin kamap tu na i gat ripot i stap pinis olsem sampela paul pasin i kamap pinis long sampela mani bilong mi insait long distrik," Micah Wes i tok.

Em i go het na i tokaut olsem taim ol dispela pasin i wok long kamap trangu ol pipel insait long ruel eria i kisim taim tru long nogat sevis long las yia na yia i go pinis tu. "Olsem na long dispela yia, ol gat bikipela laik long lukim mani bilong dispela yia na yia bihain i mas open gut, olsem pipel i ken lukim sampela gutpela developmen i kamap long distrik.

Memba bilong Vanimo Grin i go het na i tokaut tu olsem, long stapim ol paul pasin long kamap na tu long

mani i no go aut hariap long ol projek. I gat strongpela tingting nau i stap pinis long rausim olgeta mani bilong em i stap long Distrik Treseri. Wantaim tu wanem ol mani i go pinis i stap long han bilong ol arapela gavman opis olsem long dipatmen bilong Woks, na putim olgeta dispela mani insait long wanpela tras akaun em bai i kolim Vanimo Grin Tras Akaun.

Vais Minista bilong Tred na Industri i tok planti taim ol gavman opis tu i holim pas planti mani we ol i no save yusim hariap long mekim wok em ol i makim pinis long karim aut ol wok. Em i tok taim dispela ol mani stap longpela taim tumas, dispela ol mani i save paul o ol gavman opisa i save yusim long ova taim pe.

Micah Wes i tok bikipela hevi we i stap longpela taim tru insait long Sandaun em Provisel Plening Opis i nogat ol gutpela plen bilong ol bikipela wok kamap olsem bilong rot na bris.

NIU YIA SEL
LONG HANKOOK TIRE TASOL

15% OFF
 RETEL PRAIS

HANKOOK TYRES

HARIAP! NOGUT STOK PINIS

Ela Motors TYRES

SEL BAI I STAP IGO INAP LONG 31st JANUERI 2001

PORT MORESBY PH 3229400 LAE 4722322 KOKOPO 9829100 MADANG 8522188 GOROKA 7321844 MT HAGEN 5421888 WEWAK 8562255 KAVIENG 9842788 KIMBE 9835155 TABUBIL 5489060 VANIMO 8571254 PORGERA 5479367 BUKA 9739915 LIHIR 9864099 ALOTAU 6410100



SAUTEN



RIJON



Sentrel gavman i no amamas long bekim bilong siti manesa

VERONICA HATUTASI i raitim

SENTREL Provinsel Gavman i no amamas long bekim i kam long Siti Manesa Bernard Kipit long wanpela petisen bilong ol.

Sentrel provins Gavana Opa Taureka na opisel delegesen i bin prisenim tupela pes petisen leta i go long Mista Kipit long las yia Novemba bihain long sampela raskol i bin kilim dai wanpela liklik meri Gaire husat i gat


sikspela krismas klostu long Siks Mail taim em i ron long ka long go long ples wantaim famili bilong em.

Insait long dispela petisen, Sentrel Provinsel Gavman i bin askim strong NCDC long rausim ol setelmen haus long Siks Mail rabis ples na salim ol setelmen lain i go bek long ples bilong ol.

Deputi Gavana Aih I kupu i tok pasin we ol i wokim long i no wokim wnapela gutpela samting long askim bilong ol i

no gutpela na ol lain i laikim ol Palamen Memba bilong Sentrel Provins long lukluk long dispela samting.

Long wankain taim tu, Gavana Taureka i laikim bai ol lida i lukluk strong long Ebenaisesen ripot we Mosbi Saut memba Ledi Carol Kidu na komiti bilong em i bin kari-maut na prisenim i go long palamen em ol i bihainim bikos dispela i gat ansa long samting we ol i laikim long petisen.



• Patricia Kihanges bilong ples Aipeana long Bereina insait long Sentrel provins i wok long helpim long givim kaikai long ol sikmanmeri.



• Sampela bilong ol sikmanmeri long hausik i kaikaim kaikai ol i bin kisim long Sentrel komyuniti. Ol sikmanmeri i bin amamas tru long dispela pasin ol pipel bilong Sentrel i bin mekim long ol.

Papa na pikinini i dringim solwara na dai long Nu Yia

LYNNE NIMIRU i raitim

WANPELA papa wantaim pikinini man bilong em long ples Gaire i bin dai long wiken bilong Nu Yia bihain long tupela i go aut long si.

Ol ai witnes i tokim plis olsem ol sampela man i painim bodi bilong tupela ya long solwara na karim i go long ples.

Provinsel Plis Komanda (PPC) bilong Sentrel Provins, Suprintenden Nema Mondia i tok ripot i kam long opis bilong em i tok papa ya i bin go long si pastaim na i no bin kam bek gen long ples na taim pikinini man i lukim olsem, em tu i bin go long si long painim papa bilong em.

Ol ai witnes i tokim plis olsem pikinini man i bin spak nogut tru taim em i go long si long painim papa bilong em.

Bihain ol man i lukim tupela bodi i drip antap long solwara na ol i kisim i go long hausik na bodi bilong tupela papa na pikinini i stap long mog nau.

Nogat man o meri long ples Gaire i save long hau na tupela papa na pikinini i painim dispela birua long si.

Suprintenden Mondia i tok pikinini man em wanpela plisman husat i save wok long plis stesin bilong Bautama Estat we i stap long Magi Haiwe.

Long wankain taim, Mista Mondia i tok Nu Yia long Sentrel Provins i bin kamap gutpela stret.

Em i go raun long ol aut stesin olsem Kupiano na Bereina na em i lukim ol manmeri i stap isi tasol na i no biket.

Suprintenden Mondia i tok planti spot i bin kamap long ol ples em i bin go lukim we planti manmeri na pikinini i bin pilai na amamas na em i tok tenkyu long ol pipel long bihainim stret-pela pasin long selebretim Nu Yia.

Mista Mondia i tok nogat planti ka i ron long Hiritano na Magi Haiwe na nogat planti hevi long haiwe we i soim olsem ol pipel i stap long ples o haus bilong ol long selebretim Nu Yia.

Em i tok olsem PPC bilong provins, em i amamas long ol pipel long mekim Krismas na Nu Yia i kamap gutpela.

Nau yet ol Koreksensel Institut Sevis (CIS) wantaim plis bilong Nesanel Kapitel Distrik na Sentrel Provins i wok bung long painim ol dispela raskol man husat i bin ronawe long Bomana Jel long las wik.



• Ol manmeri bilong Sentrel provins i singim ol song bilong ol profet na wokabaut i go long Kiunga hausik wantaim ol kaikai na klos long givim long ol sikmanmeri olsem krismas presen bilong ol.

BOROKO FOODWORLD AT GORDONS

<i>Niu Yia</i>		<i>Spesols!</i>	
Three Cooks Oil 250ml	K0.99	Ramu Suger 1kg	K2.75
Globe Corned Beef Round 300gr	K2.20	Sanitarium Corn Flakes 500gr	K6.49
Rosella Tomato Sauce 300ml	K2.35	Roots Rice 1kg	K1.55
Hiway Hardman Biscuits 125gr	K0.40	Bumbum Nappies	K11.95
Nambawan Cordial 750ml	K1.79	Sudso Soap 75gr	K0.30
B29 Detergent Powder 100gr	K0.69	Maggi Noodles 85gr	K0.50

Supa Spesol Drais!

Selebretim Niu Yia long Boroko Foodworld Supa Krismas Spesol!

EXTENDED TRADING HOURS
 Monday to Wednesday - 8.00am to 7.30pm
 Thursday / Friday - 8.00am to 8.00pm
 Saturday / Sunday - 8.00am to 7.00pm

Planti moa kaikai prais i go daun long en!
 Ph: 325 7566, 325 0863 Fax: 325 7096

HAILANS NUIS

Ol haus kalabus long hailans i bagarap

PLANTI haus kalabus insait long ol hailans provins i no gutpela moa long lukautim ol kalabus lain i stap long en. Olsem na wok i mas kamap hariap long stretim gut ol dispela haus kalabus.

CIS Minista Henry Smith i luksave long ol dispela hevi taim em i mekim raun long olgeta haus kalabus na lukim ol na i no amamas tru. Em i bin kisim sampela toksave pinis long ol sampela rot we ol i ken mekim hariap long stretim dispela hevi. Long dispela wik Minista i bin sindaun wantaim ol sinia

CIS opisa long kisim ol toktok i kam long ol na wanem rot ol i ken traim long mekim long stretim ol hevi olsem.

Taim Mista Smith i bin kamap CIS Minista em i bin laik mekim dispela wok olsem namba wan na bikipela samting long raun lukluk long olgeta haus kalabus.

Mista Smith tu ino amamas long ripot bilong Jastis Timothy Hinchcliffe olsem Bui lebi haus kalabus i no moa gutpela long ol kalabus lain i stap long en. Sauten Hailans Gavman i bin givim K100,000 long stretim

dispela haus kalabus tasol haus kalabus ino stret gut yet na i wankain yet olsem pastaim.

Minista i bin go raun lukluk tu long ol haus kalabus olsem Bundara long Kainantu, Bihute long Goroka, Barawgi long Simbu, Baisu long Hagen na Bui lebi long Mendi. Em i no bin go long Tari bikos taim i sot.

Nupela CIS Komisina Richard Sikani i tok em i save long dispela raun bilong Minista tasol em i no inap mekim wanpela toktok bikos Minista yet bai mekim ol toktok long dispela raun bilong em.

Mista Sikani i tok em i save olsem Minista i lukim pinis na luksave long ol hevi bilong ol haus kalabus na em yet i ken tokaut long wanem gutpela rot dipatmen i ken mekim long karimaut wok long dispela hevi.

Jenerel Seketeri bilong Koreksenel Sevises Emplois Asosiesen Jethro Tulin i tok tu olsem sindaun bilong ol woda tu long ol dispela haus kalabus i mas kisim luksave tu long ol rot bilong helpim ol bikos nogat wanpela toktok tasol ol woda tu i kisim bikipela taim na stap.

Ol wok long Imbongu inap bungim hevi

JOE KANEKANE i raitim

POLITIKEL salens namel long Imbongu memba Peter Peipul na edministreta bilong Sauten Hailans provins, Pila Niningi i hot moa taim Mista Niningi i rausim edministreta bilong Imbongu Ambe Keleli.

Tasol Mista Niningi i sanap strong long disisen bilong em olsem dispela em bilong klinim ol bagarap na ol paul pasin i bin kamap insait long provins.

Dispela eksen bilong rausim Imbongu distrik edministreta inap bagarapim wok we i laik kamap long nupela Imbongu distrik hetkota we Oposisen lida Bill Skate i bin go opim long mun Novemba long las yia.

Ol wok we i no kamap yet em long wokim moa haus bilong ol pablik sevans arere long dispela nupela bikipela distrik opis. Na dispela em 5 yia plen bilong bilong distrik we i wok long laik kamap nau.

Ripot i tok ol pablik sevans i redi long go insait long dispela nupela opis na mekim wok bilong ol tasol dispela bikipela senis nau i kamap inap kamapim hevi long ol wok bilong ol insait long dispela opis. I luk olsem ol wokman bai i no inap wok yet insait long dispela opis yet bikos Mista Niningi i bin tokaut tu long taim bilong opim opis

olsem ya olsem i gat sampela teknikel wok i no pinis gut yet.

Mista Niningi i bin tokaut klia olsem em i bin laikim olsem dispela distrik hetkota inap long sanap long lombi stesin we em i graun bilong gavman na tu i namel hap long olgeta eria insait long distrik.

Mista Peipul na Niningi i bin pait long ileksen bipo na i bin go long kot pinis we Mista Peipul i kisim bek sia bilong Imbongu ilektoret.

Mista Peipul i tok ol pasin Mista Niningi i mekim i soim klia politiks wok bilong em we inap bagarapim tru ol pipel bilong Sauten Hailans na tu bagarapim dispela oil na ges provins.

Mista Peipul i tok dispela K80,000 we Mista Niningi i tok i paul olsem na em i rausim distrik edministreta em i no tru. Bikos em yet i bin karim dispela mani i go givim long lombi na Kendalg pipel makim Gavana bilong Sauten Hailans provins. Long dispela K80,000, K20,000 i go long Kendalg viles sait na K60,000 i golong lombi ples.

Tupela ples wantaim i wokim rot na kisim dispela mani long wok bilong ol. Olsem na Ambe Keleli i no ken kisim hevi nating long we dispela mani i go long en, Mista Peipul i tok. Em i singaut long putim bek Mista Keleli long wok bilong em.

CIC i tok aut long gutpela masin bilong masinim kopi

OL kopi groa insait long hailans i mas save long wanem gutpela kopi palpa o masin bilong stretim gut na mekim kopi i sup bihain long wanpela tes na lukluk raun insait long wanpela tes we Kopi Industri Kopopresen (CIC) i bin mekim wanpela lukluk raun bilong ol long ol liklik ol bisnis man husat i save yusim kopi palpa.

Wanpela meri long dipatmen bilong CIC we ol i save stretim kopi, Susan Oksap i tok dispela stadi ol i mekim long painaut long wanpela gutpela palpa bai ol fama i ken yusim long redim ol kopi bilong ol.

Ol tingting bilong dispela projek em long:

- long skelim na lukluk gut long ol palpa na skelim ol wok bilong ol long stretim ol kopi;

- Luksave long wok ol palpa i save mekim long kamapim naispela kopi insait long liklik taim tasol; na

- Long skelim na luksave long ol palpa long hamas taim ol i save wok na sapos palpa bai i stap longpela taim o nogat.

Ol foapela nupela palpa bilong holim long han em: Denlab, Wokman na Kofi King na narapela em Mekinon mini disk palpa.


Mis Oksap i tok Mekinon mini disk palpa i winim stret ol narapela palpa we sapos wanpela moto i stap long

ronim ol palpa.

Wanpela problem bilong ol palpa em ol skin bilong ol kopi insait long palpa masin.

"Kampani husat i mekim dispela mini disk palpa i tok em i save long dispela problem na i putim pinis wanpela samting long stretim ol naip bilong palpa na putim ol nupela samting long stretim problem," Mis Oksap i tok.

Em i tok Denlab dram palpa i winim ol arapela tripela long sait bilong stretim gut ol kopi bin na nogat planti bin i save weist na taim bilong stretim bin em i liklik tasol na bihain long dispela em Kofi King na Wokman i bihainim.



• Olgeta hailans Gavana i bin bung wantaim long tok nogat long wanpela toktok olsem CIC bai aninit long Fud and Agrikalsa Ogenaisesen (FAO). Ol lida i bin bung long Hagen na bihain long Kundiawa long soim sapat bilong ol long CIC i mas stap na wok long em yet na i no bung nabaut wantaim FAO.

WINIM K500 with HI-WAY

Back to School with Hi-Way Biscuits. Your chance to win K500 towards 2001 school fee. There will be one (1) lucky winner in each province.


To enter, send in 3 empty wrappers of Hi-Way Beef or Hi-Way Hardman biscuits to: Hi-Way Back to School Locked Mail Bag, Boroko, NCD, or drop your entry in box at participating stores.

Draw date: 26.01.2000

Paradise BEEF THE DIGGEST 140g NET 4 BISCKETS



MADANG NIUS



Taun kaunsel i gat hevi long mani

BEN TAUMAI i raitim

PLANTI ol wok bilong kamapim na developim Madang taun olsem wanpela naispela taun tru insait long PNG na long Saut Pasifik i no inap kamap gut bikos long hevi bilong mani nau taun kaunsel i bungim.

Bikos long dispela, taun menesa, Anton Yagama i tok olsem kaunsel i painim hat tru long mekim ol wok bilong em gut we ol taun manmeri na ol man na meri long narapela provins na kantri husat i ken kam long lukim na harim stori bilong Madang.

Mista Yagama i tok: "Mi pas tasol long hia bikos i-nogat inap mani na sapos i gat bai mi mekim ol wok we mi gat tingting long en na we planti manmeri bai amamas."

Em sutim ol dispela hevi taun kaunsel i bungim i go long Nesenel Gavman we ol i no givim ol sea bilong K20.00 long het bilong wanwan man o meri irsait long wanwan kaunsel

eria we ol i bin toktok long en long dispela Rifom Lo.


Em i tok sapos em i kisim dispela K20.00 long wanwan man na meri bai dispela i ken helpim em.

Mista Yagama i tok em i nidim olsem K40-50 milien long mekim ol wok bilong em.

Nau yet taun kaunsel i no kisim dispela skel mani bilong em long taim Rifom i kamap i kam inap nau na em i painim hat tru olsem na em i katim daun namba bilong ol wokman long 40 olgeta na tu katim ol sampela sevis.

Mista Yagama i tok nau yet ol i lukautim ol bikpela sevis olsem rausim ol rabis long ol haus, taun na strit, rausim ol toilet baket na ol sampela moa.

Wanpela rot we save helpim kaunsel em long takis bilong graun tasol nau yet Mista Yagama i tok Nesenel Gavman i no bin oraitim lo bilong kisim takis long graun na tu ol i no inap kisim gut ol sampela mani nabaut bikos long ol sampela ol hevi.



Noken pilai long pawa

• Tuperla liklik manki Manki Madang i laik kamap olsem paiaman na hangamap long rop bilong pawa rop we i bin bruk long Madang taun. Ol bruk poaa lain i save kamapim birua sapos pawa i ron yet long waia. Elkom i save toksave long ol manmeri long noken pilai wantaim ol rop bilong pawa tasol planti manmeri i no save harim tok.

3-pela Sri Lanka man stap long Beon

LYNNE MINIRU i raitim

TRIPELA yangpela man bilong kantri Sri Lanka i stap nau long Beon haus kalabus bihain long Madang plis i holim ol bikos ol i nogat paspot na ol arapela pepa we bai givim tok orait long ol long-raun insait long Papua Niugini.

Plis long Madang i tok ol tripela man ya i bin kam long Madang bihain long ol i lusim Maunt Hagen long las yia.

Sampela lain long kastoms na Kriminal Investigesen Divisen (CID) i bin tokim plis na plis i bin holim ol tripela ya na askim ol long soim ol paspot na ol arapela pepa bilong ol tasol ol man ya i bin tokim plis olsem ol raskol man long Maunt Hagen i bin stilim ol paspot samting bilong ol.

Plis i holim ol na sasim ol long dispela toktok bilong ol olsem ol i nogat ol paspot pepa bilong ol.

Nem bilong tripela man ya em Sivaruban Subramanjam, Rasaiah Selvanesan na Ponnambalam Ububurai na ol i bilong provins Jassna long Sri Lanka.

Aninit long Imigresen Ekt

bilong kantri, ol tripela i brukim Sapta 16 na Seksen 7 (1) (a) bilong Ekt we i tok sapos man o meri i kam insait long kantri na i nogat paspot na ol arapela pepa, em i brukim lo bilong kantri na mas baim kot o go long kalabus.

Stesin komanda, Edgar Sebastin i tok ol tripela ya i bin go long kot long mun Septemba na Oktoba long las yia na long Desemba 29 ol i kamap gen long kot na kot i painim ol i rong na tokim ol long baim K200 o go kalabus long tupela mun.

Plis i bilip olsem ol i mas kam olsem long boda bilong Vanimo na Irienjaya na go antap long Westen Hailens na bihain ol i bihainim hailens haiwe na kam daun long Madang.

Em i tok ol lain ya i nogat mani long baim kot olsem na ol i go kalabus long Beon Jel long las wik.

Nau yet plis long Madang i wetim tasol disisen bilong imigresen divisen long Dipatmen ov Foren Afes na Tred long Pot Mosbi.

Long wankain taim, wanpela wait man bilong Austrelia i kisim

tupela sas na stap long Beon Jel.

Man ya em Francis Kenneth Leslie na krismas bilong em i olsem 40 samting na em i bilong Karei Bei long Nu Saut Wels.

Plis i painim mariwana o spak brus long bot bilong em na ol i bin sasim em na bihain ol i go sekim bot bilong em na ol i painim tenpela 303 raifel we ol i save yusim long wo wantaim 1,125 ol katres.

Ol i ktsim tu wanpela Winsesta sot gan wantaim 15-pela katres . Plis i no save wai na man ya i gat ol dispela samting long bot bilong em.

Mista Leslie i bin seil long bot bilong em i kam insait long Madang long Septemba bilong las yia.

Em i go long kot long Desemba 18 bilong las yia we Madang distrik kot i bin painim em i rong na tokim em long baim K3000 tasol em i nogat kain mani olsem na ol i salim em i go long Beon long kalabus tripela mun.

Kot i holim ol raifel, sot gan na ol katres bilong em we Stet bai kisim.



Nambawan gret 8 greduesen

• Yangpela susa ya em wanpela bilong ol nambawan gret 8 samatin husat greduet long Desemba, 2000 long Sen Lorens Top-ap Luteran skul insait long Simbai long Madang provins.

trukai.
RICE



SAPOS NAMBA BILONG YU ISTAP LONG HIA. YU WINIM K200

E00894992 D00187352 B01131245 C01087778
C00785547 A00044645 B00251801
A00960534 F01131266 D01056088

LONG KISIM PRAIS BILONG YU. GO LONG TRUKAI DISTRIBUTION CENTRE.

Lae Nius

Mumeng stesin na rot kisim taim yet long wara

BIKPELA bagarap long Mumeng bris na haiwe rot i stap yet tasol ol lain long atoriti i traim long stretim sait sait rot na kapsaitim ol graun i go antap long ol rot we i bruk long en. Dispela em long mekim isi long ka i ken ron igo i kam long Lae na Wau Bulolo.

Bikpela wara Kumalu i mekim-save long Mumeng bris na brukim rot ka i kam daun olgeta long Mumeng stesin na hap haiwe rot i go bek long Bulolo Wau.

Narapela hap wara tu i kam daun long Zenag i tait tu na kam daun brukim rot ka na i go bungim wantaim wara Kumalu long rot i go long Buang.

Dispela tupela wara i kamapim bikpela bagarap tru long haiwe rot we i kamapim bikpela hevi tru long ol manmeri long i go kam long Lae na Wau Bulolo long ples na wok na tu i bagarapim tru planti wok na bisnis long rot gut.

Wara Kumalu i gat rekot long

bipo yet long bagarapim ples na i save kosim planti mani olgeta taim long stretim rot na mekim nupela na strongpela bris.

Ripot i tok i gat wanpela bikpela masin i stap na i save traim long brukim graun long sait sait long opim wara na tu traim long rausim ol ston na graun i bruk i kam daun long rot taim ren i pundaun na ol graun i bruk nabaut i kam daun blokim rot.

Dispela masin i stap yet na i wok

long kliam rot na ol ka i wok long ron i go kam.

Wantok i traim long kisim toktok bilong Morobe Provinsal Disasta na Emejensi komiti tasol i hat.


Morobe Provinsal Plis Komanda Sief Inspekta Peter Nesett i tok ol wok bilong plis long lukluk na helpim long wanem kain rot ol i ken mekim i go het long dispela hap. Em i tok i tru rot i bagarap long bikpela tait wara tasol ol samting i wok long go gut liklik long sait

bilong ol manmeri i muv i go kam. Em i tok dispela hevi bilong wara i bagarapim rot i no kamapim arapela hevi long sait bilong lo na oda. Ol plisman long Mumeng tu i wok i stap, em i tok.

Bikpela ren long Mumeng eria i as bilong tupela wara wantaim i tait i kam daun na kamapim ol dispela bagarap long ples na haiwe rot.

Planti gavman sevis long Mumeng stesin i bungim bikpela hevi long dispela bagarap.

Morobe Gavman bai stretim rot bilong skul fi sabsidi



• Gavana Luther Wenge.

YAKAM KELO i raitim

MOROBE Provinsal edministresen bai stat long skelim mani bilong skul sabsidi bilong namba wan kota i go long olgeta skul insait long provins.

Morobe Gavana Luther Wenge i tokaut aste olsem long dispela wik, ol bai sindaun wantaim ekting Edministreta Manasupe Zurenuoc na skelim ol toktok na tingting long dispela wok bilong brukim skul sabsidi long ol skul. Bihain bai em i tokaut klia long dispela disisen bilong ol.

Gavana Wenge i tokaut tu olsem Morobe Gavman i makim pinis wanpela kampani long kisim kontrak bilong saplain ol skul samting long olgeta skul insait long provins. Olsem na ol bai sindaun tu na glasim na skelim ol kontrak na dispela rot long taim bung bilong ol i kamap long dispela wik.

Arapela ripot long provinsal edministresen i tok ekting edministreta bilong Morobe provins i bin kisim toksave pinis long sekim sapos i gat sampela mani istap, orait em i mas skelim long ol skul nau long dispela mun Jenuari. Dispela bai sabsidi bilong namba wan kota.


Wantok i traim long kisim ekting edministreta Manasupe Zurenuoc tasol telepon i no kisim em.

Morobe Provinsal Gavman i mekim disisen pinis long taim bilong brukim 2001 provinsal baset tupela wik i go pinis olsem bai gavman i baim 60 pesen (%) bilong skul sabsidi i go long olgeta skul long provins. Na papamama yet bai baim narapela 40%.

Dispela toktok bilong skul fi sabsidi i bin kamapim bikpela toktok tu long las yia we i lukim olpela Edministreta Ainea Sengero i pinis long wok bilong em bikos Morobe Provinsal Gavman i tok Mista Sengero i no bin givim gupela stia tok long ol long dispela wok bilong skul fi sabsidi long las yia.



EFTPOS BANKING MAKES SHOPPING EASIER FOR YOU



With the widespread convenience of EFTPOS machines in more locations than any other bank, you'll find that your cash requirements and shopping just about anywhere in Papua New Guinea has become easier.

Talk to us, we'll show you many ways of convenient banking. PNGBC, leaders in electronic banking.



Holi Famili Angliken Sios i op gen long ol pablik bilip manmeri

ALCINDA TRAWEN i raitim

HOLI Famili Angliken Peris long Hohola insait long Nesenel Kapitell Distrik i op nau long ol prisina i go lotu long en bihain long em i bin pas insait long 14 mun.

Bilong opim bek sios, ol bin wokim Riniuwel Misa lotu long sios ya long Nu Yia.

Riniuwel Misa i bin olsem mak bilong nupela stat we Pater William Dobunaba i bin go pas long en.

Samting olsem 140 pipel i bin kamap long Riniuwel Misa na long dispela mak, 20-pela tasol em ol parisina. Ol arapela em ol bilong ol arapela peris insait long siti.

Bipo long dispela sios sevis long opim bek Holi Famili Sios, ol bin putim ol tok-save long ol arapela peris long Mosbi long sapotim Holi Famili peris na go stap insait

long riniuwel sios sevis long Nu Yia.

Pater Dobunaba em i saplen bilong Yunivesiti na ol i makim em long lukautim Holi Famili peris inap long namba wan Sande bilong Lent. Dispela em long wetim Bisop Ayong i opiseli makim Pater Danny Bray Guka olsem rekta bilong Holi Famili Peris yet. Pater Guka long dispela taim i lukautim Gerehu Peris.

Pater Dobunaba i bin tokim Wantok olsem bikpela tingting bilong en em long kisim bek ol olpela perisina. Em i tok ol i mas rausim tu hostel bilong sios long hap bikos sios i wok long tromoim bikpela mani long lukautim. Ol raskol i bagarapim pinis dispela hostel.

Nu Yia misa lotu em namba foa sios sevis we ol i holim stat yet long taim peris i pas. Ol i no save wokim ol sios sevis bikos long

sampela sios politikis yet. Sios i bin pas taim pater Koieba husat i bin lukautim Holi Famili peris i ritai-bihain long 24 kris-mas.

Pater William i bin tok em ino isipela wok long opis bek peris bikos planti taim, sampela lain i wok long laik mekim nabaut long en taim em i karimaut ol wok bilong em long hap. Tasol em i tok em i lukim ol sainmak olsem ol gutpela samting bai kamap na gro gut na olsem em bai wokim olgeta samting long mekim wok bilong peris i ron gut tasol.

Long wankain taim tu, Pater Dobunaba i i apil i go long ol olpela perisina bilong Holi Famili long go bek na lotu long hap. Stat long Nu Yia, taim bilong lotu bai kamap long Sarere na Sande, long wankain taim yet lotu i bin save kamap long en.

Tripela SVD Brata lusim kantri long skul semineri long Filipins

VERONICA HATUTASI i raitim

TRIPELA Katolik SVD O Divain Wod Brata i bin lusim kantri long dispela wik long skul postulen long Filipins.

Tripela ya em long Brata Billy bilong Bogenvil, Robin Wali na Steven Manau tupela bilong Is Sepik.

Tripela Brata bai skul long Calapan SVD Novisiet long tupela yia.

Tripela ya em ol i namba foa grup long go skul long Filipins taim Fomesen Novisiet progrem i bin kirap long sampela yia i go pinis nau. Pastaim ol bin save wokim progrem ya hia long PNG.

Aninit long nupela progrem bilong ol, Ol SVD i save wokim wanpela Postulensi bilong ol na bihain long en, stadi long tripela yia bipo ol i go long wanpela yia pastorel wok, Na bihain

ol bai go bek skul Tioji long foapela yia.

Tripela Brata i bin lusim Mosbi long dispela Mande apinun.

Ol famili bilong ol i bin amamas long ol pikinini bilong ol ya i wok long go skul long ovasis.

Wanpela samting tasol em ol i bin wari long en em i gat polisi long kontrak bilong ol olsem sapos wanpela i stadi yet long hap na i dai, ol no inap long

salim bodi i kam long ples tasol planim long hap.

Tripela Brata tu ya i amamas long go skul long hap na antap long skul semineri, ol bai lainim tu narapela kalea na ol arapela samting moa olsem.

Taim ol i kam bek bihain long tupela yia, ol bai skruim skul long Tioji na bihain long foapela yia bilong skul, ol bai kamap pater.

Alukuni i gat nupela sios bihain long 10-pela krismas

OL ALUKUNI pipel long Hut Lagun eria bilong Sentrel provins i gat nupela haus lotu we ol i bin opim long Krismas wik.

Praim Minista Sir Mekere Morauta i bin opis sios bilding ya bihainim askim bilong ol bikman bilong sios long eria.

Nupela sios bilding i kostim K400,000 long wokim. Na ol i no kisim mani sapot long ausait tasol hatwok bilong ol ples lain yet long kisim pis na salim insait long 10-pela krismas na tu kontribusen bilong ol wanwan perisina i karim kaikai taim nupela sios i pinis.

Stat yet long 1986, ol perisina i bin resim moa long K400,000 long dispela sios we ol i kolim long Mani. Ol bin makim tu wanpela komiti long bungim na lukautim mani long en.

Komiti i bin makim Loi Ila em wanpela seveia long wokim plen bilong bilding na amas mani bai i kostim long sanapim sios bilding ya. Bipo Mista Ila i wokim plen, ol pleslain i bin wanbel olsem ol bai wokim nupela sios bilding antap long olpela wan. Bihainim dispela, ol bin rausim tasol ruf bilong sios.

Mista Ila i bin wokim plen we i bin kamap wantaim K124,000 olsem manimak bai ol i tromoim long sanapim nupela sios bilding ya. Em bin wokim plen fri na em i no askim long pe long dispela wok.

Taim komiti i holim plen bilong bilding, tresera Kali Alu i bin redim mani baset plen we insait long faivpela krismas i stat long 1994 inap long 1998, ol i mas resim mani long en. Baset i bin gat plen long rot we ol bai bihainim long resim dispela taget manimak long K124,000.

Long 1993, ol pleslain i bin tok orait long plen long bihainim wanpelin (Kwalu) sistem long resim mani long en.

Orait, insait long 10-pela krismas, ol pipel bilong Alukuni i bin salim pis long resim mani bilong sios ya. Ol i no bin holim sampela bikpela fan resing wok.

Insait long ol anuel sios memorial selebresen, ol wanwan klen na famili i save peim kontribusen bilong ol i go long nupela sios.

Kaikai long ol hatwok bilong ol i bin kamap taim Praim Minista i opim nupela Alukuni Sios long tupela wik i go pinis.

Sir Mekere long toktok bilong em taim em i opim nupela sios bilding i bin tok stori bilong nupela sios i olsem piksa stori bilong sanapim kantri.

Em bin tok Yunaitet Sios long Masel Lagun eria i helpim long sevim gut spirituel laip bilong ol pipel bilong Alukuni, Keapara na Kwarara.

Em bin tok ol pipel yet i kisim gutpela samting long strong bilong ol yet, wankain tasol olsem samting we gavman i laik helpim ol pipel long kisim na dispela em long ol long gat ol gutpela haus i gat ol nupela samting long en. Em bin givim tok piksa long namba wan palamen haus we ol bin wokim long taim kantri i kisim independens nas nau ol i sanapim nupela palamen haus long kisim ples bilong dispela olpela wan ya.

Ol sios long Betela na Berthsaida long Alukuni em ol bin sanapim ol long ol yia 1920 na 1963 na ol i liklik tumas bikos i gat moa pipel nau.

Samting olsem 450 pipel inap long sindaun insait long nupela Mani sios.



Ol skul pikinini...

• Ol skul pikinini long Aitape i wok long kisim gut helpim nau bihain olpela skul bilong ol i bagarap long solwara.

Nambawan misinari long Aitape selebretim 83 bon de

JAIVE SMARE i raitim

Long Nu Yia de Mande Januari 1,2001, komuniti long Pater Antoinet Senta bilong ol Disebel i bin amamasim tupela samting.

Dispela em kamap bilong nupela yia na 83 krismas bilong wanpela spesel man na em long Pater Leo Leoni.

Insait long ol selebresen, ol pikinini bilong praimer skul long senta i bin putim kamap ol danis, ol pilai drama na wanpela danis grup bilong Yakumul i bin makim ol disebel pipel long Aitape/Lumi eria..

Long makim maus bilong ol disebel lain we em i helpim long wok bilong em long Pater Antoinet senta, Yakumul danis grup i bin tok tenkyu long Pater leo.

Pater leo i bin tok "tru mi kamapim wok, em i samting bilong

yupela nau long skruim wok bikos nau mi pilim tait na mi mas malolo."

Pater Leo i stap long Aitape moa long 50 krismas na em i save wok wantaim ol pipel i gat sik lepra, na tu wokim ol progrem bilong ol disebel long Aitape.

Pater leo i bin kamap long Aitape long 1952 na statim wok long Ali Ailan. Bihain em i wok long leming na bihain long 1954, em i kamap peris pris long Pes we i stap 25 kilomita longwe long Aitape. Em bin wok long hap long 41 krismas bipo em i ritai long 1995.

Long taim Pater Leo i wok long Pes, ol pipel i yusim han bilong ol tasol long bildim ol rot long Yalingi Riva i go long Aitape. Nau dispela rot i hap bilong nesenel haiwe. Pater leo i bin i bin save givim skul katekismo na tu helpim ol pipel i

kirapim ol liklik bisnis olsem wokim ol fenitja samting.

Pater Leo i bin konektim ol paip wara long kisim wara i go long ples Pes na tu kirapim wanpela kapenta skul bilong ol manki na vokesenel skul bilong ol meri.

Em bin bildim etpos tu long eria.

Em i tok maski mani i sot, em bin helpim ol pipel long wokim ol dispela wok long kamapim divelopmen.

Long 1975, Pater Leo i bin go insait long wok bilong lukautim ol lain wantaim sik lepra long Pater Antoinet Senta. Em i wok nau long hap na long olgeta moning em i save wokim Misa Lotu.

Bipo long Pater Leo i kam long PNG, em bin wok long Saina. Long 1946, ol Komunis i bin holim pasim Pater Leo wantaim ol arapela misinari long tupela yia bipo ol i rausim ol long kantri.

NCDC i planim gen narapela 29 dai bodi

LYNNE MINIRU | raitim

NESENEL Kapitel Distrik Komisnin i planim gen narapela 29 dai bodi long nain mail matmat bihain long ol bodi i stap longpela taim long mog.

Ol wokman bilong Pot Mosbi Jenerel Hospitel i bin toksave pinis long ol wantok na ol famili bilong ol manmeri i dai pinis long go na kisim ol bodi tasol nogat wanpela i bin go olsem na NCDC yet i bin go pas na planim ol bodi.

"Man i go pas long Helt long NCDC, Robin Yanopa i tok ol dai bodi i bin stap longpela taim na kamapim smel nogut na Korona i bin givim tok² orait long helt divisen bilong NCDC long planim ol bodi.

Long Novemba las yia NCDC i bin planim sampela moa ol dai bodi taim ol lain bilong ol i no bin go na kisim ol.

Long dispela 29 dai bodi i gat 13-pela ol bikmanmeri, 14-pela ol bebi na tupela liklik pikinini.

Opisa husat i bosim mog, Koivi Pirika i tok ol i save larim ol dai bodi bilong ol bikpela manmeri i stap long mog olsem 28 de na ol bebi em tupela wik tasol.

Em i tok bet long mog i save holim tasol wanpela bodi tasol bikos long spes i liklik na ol i save putim tupela dai bodi long wanpela bet.

Mista Pirika i tok bihain long wanpela mun ol i save toksave long NCDC long go na kisim ol dai bodi na planim ol tasol NCDC i save kisim longpela taim liklik we ol i save stretim ol pepa wok na painim ol kontrakta long digim graun na planim ol bodi.

Mog long bikpela hausik i save holim tasol 60 dai bodi long wanpela taim.

Ol skul bai kisim saplai bilong ol long mun Februeri

NEVILLE CHOI | raitim

OL skul wantaim liklik gred insait long Sauten rijon bai kisim skul saplai bilong ol we ol i bin wetim longpela taim tru long statim nupela 2001 skul yia.

Plantim skul i bin kisim taim stret taim saplai bilong skul i no bin go long skul long pinis bilong yia.

Dipatmen bilong Edukesen i bin givim pinis kontrak long ol kampani long saplaim ol samting bilong skul long ol skul insait long Sauten rijon na tu long Nesenel Kapitel Distrik.

Tupela kampani wantaim ol liklik ol stoa bilong ol i bin winim kontrak.

Spring Holdings Intanesenel em wanpela bilong ol husat i bin winim kontrak long saplaim ol samting bilong skul.

Narapela em PNG Stesineri na Opis Saplai husat i bin gat sampela problem wantaim Edukesen Dipatmen long ol kontrak bilong ol.

Problem i bin kamap taim ol i kisim longpela taim stret long saplaim ol skul wantaim ol samting bilong ol.

Skul yia bilong 2000 i bin pinis tasol ol skul long Sauten rijon i no bin kisim wanpela saplai bilong ol.

Skul yia bilong 2001 i gat tupela wik tasol long go na Edukesen Dipatmen i amamas olsem wanpela bilong ol kampani bai kisim ol saplai bilong ol i go long skul taim ol skul long Sauten Rijon i op.

Sekreteri bilong Edukesen, Peter Baki i tok Spring Holdings Intanesenel i stretim pinis ol pepa wok bilong ol na bai stat long kisim ol saplai bilong ol i go long ol skul long las wik bilong dispela mun na nambawan wik bilong Februeri.

"Spring Holdings i redi pinis long saplai. Nau yet ol skul i pas na ol tisa i no kam bek long skul long tis olsem na nogat man o meri i stap long lukautim ol saplai" Mista Baki i tok.

Em i tok maski Spring Holdings Intanesenel i redi long givim ol saplai, PNG Stesineri na Opis Saplai bai kisim sampela taim moa long stretim ol kontrak pepa bilong ol long sait bilong lo.

Mista Baki i tok kampani i bin mekim tripela toktok we em i laik save sapos em i bai karim ol saplai i go stret long dua, ol bai baim kampani taim em i givim ol saplai bilong ol o sapos gavman i ken baim ol long ol wok ol bai mekim.

"Ol dispela kain toktok em kampani bai stretim wantaim stet solisita," Mista Baki i tok.

Ekting Komisina i asking yunion long wok bung wantaim menesmen

ASISTEN Komisina bilong PNG Koreksenal Sevis, John Tara i tok em i no amamas long toktok bilong Koreksenal Sevis Emplois Asosiesen (CSEA) egensim menesmen bilong Koreksenal Sevis.

Em i tok olgeta samting yunion i bin askim em menesmen i stretim pinis taim mani i bin planti.

Mista Tara i tok dispela ova taim mani bilong ol memba ol i bin givim tu i bai gat planti tingting long sait bilong ol memba olsem na ol yunion bai kisim toktok long ol i no bin tinting gut na mekim samting.

"Mi salensim ol yunion long tok stret long wai na ol menesmen i no bin mekim samting stret na ol dispela 18-pela ol raskol man i bin ronawe long Bomana Jel na tu ol yunion mas tokaut stret long pasin bilong ol menesmen long taim ol raskol i ronawe," Mista Tara i tok.

CSEA i wok long bagarapim nem bilong menesmen bilong Koreksenal Sevis wantaim kainkain toktok we i no stret na dispela em i no gutpela long ai bilong ol pablik."

"Mi laik askim ol dispela man husat i wok long sutim tok i go kam long stapim

kain pasin bikos Koreksenal Sevis i bin sainim pinis wanpela Memorandum ov Andastanding (MOU) wantaim yunion na menesmen.

Komisina Ken Serupi yet i bin sainim dispela MOU long Dipatmen bilong Pesenel Menesmen bipo long em i go long Goroka.

Dapatmen bilong Fainens na Dipatmen bilong Pesenel Menesmen i no amamas long kain toktok bilong yunion bikos planti bilong ol samting i stap insait long MOU em Koreksenal Sevis i bin karim aut pinis.

Lip fe bilong ol memba na ovataim mani na ol arapela samting em ol i lukluk long em pinis tasol em bai kisim longpela taim liklik long stretim olgeta wok fos bilong Koreksenal Sevis.

Mista Tara i tok ol yunion i mas luksave na amamas olsem long nambawan taim long histori bilong em, Koreksenal Sevis i bin stretim rot bilong em pinis we baset bilong em bai go antap long 60 pesen.

Em i askim yunion long wok bung wantaim menesmen long karimaut ol wok we baset i bai sapotim long dispela yia.



• Dairekta bilong Goroka Independens Pre-skul, Backlay Kaupa (raithan) na tisa Metike Benny i sindaun long poto wantaim ol namba wan sumatin bilong ol long kama. Gips i luk fowat long kisim moa sumatin long dispela yia na igo. Foto: SAPE METTA.

Yunion bos i askim ol wokman long mekim gut ol wok

PAPUA Niugini Habas Bod Nesenel Emplois Yunion (PNGHBNEU) i bilip strong olsem insait long ol hevi i kamap long dispela kantri we i mekim laip bilong ol pipel i hat tru, ol wokman bilong kantri i kisim bikpela hevi long sosaiti.

Presiden bilong PNGHBNEU, Fred Ruin i mekim dispela toktok bipo long kantri i lukim nu yia.

Em i tok ol yia i kam na go tasol nogat wanpela gutpela senis i kamap long ol pipel maski sapos man i holim bikpela wok o nogat, stori em wankain tasol.

Mista Ruin i tok ol wokmanmeri bilong Gavman o praivet kampani i kisim taim long ol disisen bilong wanwan bod na menesmen bilong ol long katim daun ol mani bikos ol bikman bilong ol long Gavman i tokim ol long mekim na ol kampani husat i save givim ol wok.

Em i tok ol Gavman i save wok aninit long planti presa long sait bilong ekonomi na tu ol i save senisim ol polisi bilong ol klostu klostu na dispela i mekim ol i no ronim gut kantri.

Em i askim olgeta pipel long luksave long ol ekonomik problem i kamap nau long kantri na traim long lukautim ol yet wantaim ol famili bilong ol.

Presiden i gat bilip olsem kantri bai pundaun bikos ol wokman i no inap long sapotim ol yet na famili bilong ol.

Em i tok ol wokman i no save wok gut bikos ol i save raun nabaut na traim long painim ol kaikai samting bilong ol famili bilong ol.

Ol prais bilong ol kaikai samting long stoa i go antap tru na ol pipel i kisim taim pinis long helpim ol yet.

Mista Ruin i tok em i askim Gavman long luksave long dispela hevi bikos ol pipel i les long dispela sistem bilong Gavman we Gavman yet i bin kirapim.

Ol pipel bilong PNG i mas tingting stret na ol i no ken ting olgeta samting i orait na Gavman bai pasim ai na i no inap luksave hariap long ol problem i stap long kantri.

Ol wokmanmeri i wok long dinau long mani long ol pren na wantok bilong ol na taim fotnait i kam ol i save givim olgeta mani long dinau na ol i save stap nating.

Dispela i mekim ol pipel i stap hangere olgeta taim na Gavman i mas traim long stretim dispela problem hariap.

Mista Ruin i givim tok salens long wanwan memba bilong PNGHBNEU long wok gut long insait long ogenaisesen bilong ol bikos Habas Bod em i rot bilong olgeta gutpela samting i kam insait long kantri na tok i mas gat gutpela yunion na menesmen pasin long sait bilong wok.



• Dem Josephine Abaijah na Ledi Roslyn Morauta long raithan i mekim danis wantaim ol mama na pikinini bilong Ketarobo singsing grup.



• Dispela lapun man i soim stail long stap insait long wanpela kikbal tim we ol bin salensim ol arapela insait long bikpela selebresen we ol i bin holim long Yongomul peris, Simbu. *Poto: SAPE METTA.*



• Dispela grup bilong Sen Francis sios long Gordons plis bareks i no isi long paitim yukalele na singsing long Katolik Yut So we i bin kamap long Sir John Guise Stadium las yia. *Poto: IVAN BAYAGU.*




• Mikeru Kalsa Grup i mekim bikpela singsing na danis long taim gavman i go opim Bereina Malalaua rot long Galp provins las yia.



• Lephau: Lukaut long man Japan ya. Baga tu i pulim kundu na pairapim wantaim ol lain long Rabaul.

• Raithan: Kain stail danis bilong ol Morobe save kamap tru taim ol i amamas na brukim kundu long bikpela de.



WANTOK
NIUSPEPA BILONG OL PAPUA NIUGINI

Strong bilong mani i pundaun yet

STRONG bilong mani (Kina) i wok long pundaun yet na i no soim wanpela sain bilong strong bilong mani bai igo bek antap gen. Taim strong bilong mani i wok long go daun yet, ol bisnismen na ol save-man bilong bisnis i gat wari bikos wok bilong ol bai i no inap go gut. Ol i no inap mekim gut mani, ol bai baim planti samting long bikpela mani moa i kam long ovasis na ol bai lusim moa mani na wok bai pundaun.

Taim yumi lukim dispela wari bilong ol bisnis lain, yumi tu i ken stat luksave olsem hevi bai kisim yumi wanwan manmeri long kantri bikos taim ol bisnis i no wokim mani, bai i nogat wok. Kampani i mas lusim sampela wokman bilong em na stapim sampela wok operesen bilong em bikos mani i no inap long lukautim olgeta wokman na ol wok bilong em.

Taim ol bisnis i gat hevi long mani, ol haus mani (ol beng) tu bai bungim hevi bikos i kampani i no putim inap mani long beng, ol manmeri i no moa putim mani long ol pasbuk na ol beng tu i no inap mekim gut mani long ol bisnis invesmen bilong em.

Taim planti bisnis i no mekim gut mani, ol bai traim long apim prais bilong ol samting ol i mekim bikos ol i mas kisim bek inap mani long wanem samting ol i baim. Sapos ol i baim ol kago na saplai i kam long ovasis, ol i mas baim bikpela mani moa bikos mani bilong PNG i daun tru long mani bilong ol arapela kantri. Olsem na dispela bisnis o kampani i lusim bikpela mani tru na em i mas traim long pulim bek dispela mani em i lusim. Sapos nogat, bisnis bai bruk daun.

Olsem na sampela bisnis we i save wokim na salim ol saplai o givim ol sevis bai prais bilong ol long ol samting ol i salim. Kain olsem Air Niugini balus i mas apim prais bilong balus tiket bikos em i save go long sevis long ovasis na baim ol fiul na ol pats bilong enjin i kam long ovasis. Taim strong bilong PNG Kina i daun tru, yumi ken klia olsem Air Niugini i mas

baim bikpela kos moa long kisim ol dispela samting na mekim balus i ron gut long givim sevis long pipel. Olsem na em i mas salim dispela sas i go antap long balus tiket na yumi i baim.

Wankain tu long ol bikpela stua we i save salim ol rais na ol bikpela kaikai o kolos nabaut i kam long ovasis. Ol tu i mas apim prais.

Planti bisnis lain long narapela kantri bai i pret long kam kirapim bisnis hia long PNG bikos ol bai pret long hevi bilong mani we i daun tru na ol bai i no inap mekim wanpela gutpela profit na kamapim wok long planti manmeri husat i nogat wok.

Hevi bilong mani i kamap bikpela olgeta wik na ol bikpela

beng o haus mani olsem ANZ beng i tokaut long ol ripot bilong em long dispela wik.

Strong bilong Kina i sanap olsem US\$.29 cents (Amerika dola) na AUS\$.59 cents (Australia dola) i no gutpela tru. Dispela i min olsem \$.29 cents na \$.59 cents bilong tupela kantri ya i wankain long wanpela K1. bilong PNG.

Wol Beng tu no tokaut long ol rot em bai helpim PNG long dispela hevi bilong mani. Em i wok long toktok tasol long ol rot bai Gavman i pulim mani long en olsem salim ol bikpela bikpela gavman bisnis olsem Telikom, PNGBC beng, Air Niugini na ol arapela bisnis moa.

Ating Wol Beng i mas tokaut tu long ol arapela helpim em i ken givim olsem dinau long ol manmeri

i ken kisim mani bilong kirapim ol plentesen na ol bisnis projek olsem agrikalsa na laivstok we mani bai i kamap long ol longpela taim i kam bihain. Olgeta taim gavman i wok long toktok tasol long Wol Beng long salim dinau mani i kam bai ol putim i go insait long baset bilong kantri. Tasol sapos Wol Beng i no laik salim mani i kam na go long baset, bai i hat olgeta long gavman i mekim wanpela bikpela wok.

Olsem na gavman bilong Papua Niugini i mas tokaut nau long ol pipel bilong dispela kantri wanem tingting em i gat na wanem eksen em bai mekim long traim apim strong bilong mani (Kina) i go bek antap gen. Yumi noken salensim gavman long ol dispela hevi i

kamap bikos ol dispela hevi i gat bikpela bagarap long en.

Olsem na nogat lain bai ting ol inap stretim dispela hevi we i gat pen na hat taim we olgeta pipel bai bungim long laip na sindaun bilong ol long kantri.

Bikpela samting nau em long olgeta gutpela saveman bilong kantri i mas bungim tingting na sapot wantaim long kamapim ol tingting na rot bilong gavman i ken bihainim o kamapim long stretim dispela hevi bilong mani bai olgeta manmeri i ken painim isi long prais bilong kaikai long stua, ol i no ken lusim wok bilong ol, ol bisnis wok i ken go het gut na kantri i ken gat mani na strong bilong Kina i ken go bek antap olsem bipo.



Sir Michael Somare i toktok wantaim ol Bogenvil lida, (Iephan) Joseph Kabui na (raithan) Gavana John Momis. Gavana i senisim Somare long wok bilong Bogenvil na makim Minista Moi Avei.

OL HAP HAP

nius

PNGBC beng orait long baim ol kopra groa

na dispela i brukim lo bilong CMB bod long makim menesmen. Olsem na siaman i mas kisim bek Mista Kiele o nogat bai ol i holim bikpela straik.

• Wanpela mausman o man i makim Papua Niugini long Kenbera long Australia bai lusim Australia na kam bek long PNG bikos pikinini man bilong em i mekim trabel long hap. Bikman ya em Frank Aisi na em i namba tu seketeri na gavman i rausim kontrak bilong em. Kot long Australia i painimaut olsem pikinini man bilong Mista Aisi, Desmond i bin paitim wanpela yangpela boi Australia na brukim nus na tit bilong em. Gavman i rausim papa bilong em long wok na olgeta famili bai kam bek long PNG.

• Yunion bilong ol woda, Korektiv Sevis Emplois Asosiesen i egensim tru disisen bilong menesmen long rausim (saspenim) 10-pela woda opisa long Bomana bihainim hevi we i kamap long krismas, taim 18 kalabus lain i ronawe long banis.

Ol yunion i tok dispela eksen bilong rausim 10-pela woda lain we ol i no inap kisim potnait pe tu i krangi olgeta. Yunion i sutim tok i go long Asisten Komisina bilong operesen John Tara bikos em yet i asua long i no givim givim sekuriti operesen plen bilong krismas na nu yia taim long ol woda. Ol i tok sapos Mista Tara i bin givim ol dispela plen, ating bai i nogat kalabus lain i ronawe long banis.

Jenerel Seketeri bilong asosiesen Jethro

Tulin i raitim pas i go pinis long nupela Komisina bilong CIS Richard Sikani long rausim dispela disisen bilong CIS menesmen aninit long olpela siaman, Ken Serupi.

• PNG Benk na Fainensel Institusen Wokas Yunion i egensim disisen bilong Nesenel Providen Fan (NPF) long katim sevis bilong ol NPF memba long 15 pesen (%).

Nesenel Presiden bilong yunion Reuben Elijah i tokaut olsem wanem hevi i bin kamap long mani bilong NPF i no wanpela samting ol membas i mekim. Dispela em hevi bilong ol menesmen na Gavman bikos ol i yusim mani bilong NPF long ol wok bilong Gavman na mani i sot. Olsem na em i tok i hat tru long katim mani bilong ol membas nating long ol samting we ol membas i no mekim.

Mista Elijah i tok i gutpela long gavman i laik givim K60 milien long traim daunim hevi bilong NPF, gavman i mas putim moa mani yet long pinisim olgeta hevi bilong NPF bai mani bilong ol membas i ken stap gut.

Mista Elijah i tok dispela em sevis bilong ol wokman bilong ol praivet kampani na ol bisnis long we ol bai kisim taim ol i pinis long wok na go bek long ples bilong ol long bihain taim. Tasol gavman i save kisim dispela mani bilong ol pipel na mekim ol rot, bris na ol bikpela projek wantaim. Olsem na gavman i mas stretim hevi we mani i sot long NPF na i no ken tasim sevis bilong ol membas, em i tok.

• Passam Nesenel Hai Skul bai kisim ol gret 11 studen long dispela yia. Seketeri bilong Edukesen Peter Baki i tok skul bai kisim olsem 250 studen long dispela yia. Em i tok dispela disisen bilong em i go pinis long ol tisa husat i stap long hap.

Em i tok tisa i wok long mekim ol senis na redim ol samting bilong kisim ol dispela lain studen i-go long skul long narapela tripela wik bihain.

Tasol long las yia, skul i bin raitim pas i go long Edukesen Seketeri na askim long noken oraitim ol nupela gret 11 i go long Pasam long dispela yia. As bilong dispela pas em long stapim ol bikhet pasin bilong ol studen husat i stap pastaim long i noken go daun long ol nupela studen husat i kam insait long nupela yia. Mista Baki i tok ol i bin wanbel long dispela taim bihain ol i senisim gen disisen ya bikos planti pikinini long dispela yia i bin kisim gutpela mak long gret 10 bilong go long ol nesenel hai skul, Mista Baki i tok.

• Wok painimaut i go insait long wok bilong Woks dipatmen i painimaut olsem wanpela man Sentrel provins i bin kisim K100,000 long mekim wok kontrak long ol rot long Sentrel provins tasol ol wok no kamap tru. Plis i sasim dispela bikman ya pinis na ol i bilip moa lain bai kam aut yet long dispela wok painimaut igo insait long wok bilong Woks na ol rot mani i go long en long las yia.

• Ol kopra groas insait long Papua Niugini i ken gat sans long kisim mani long PNGBC benk bihain long ol i painimaut long las wik olsem sek mani bilong ol i no inap kisim mani tru long beng. Bikos Kopra Marketing Bod (CMB) i nogat mani long pasbuk. Tasol long bung bilong CMB wantaim PNGBC beng long dispela wik, toktok i kamap gut na beng i oraitim long peim ol kopra groa husat i go long beng long kisim mani wantaim sek bilong ol. CMB ekting sief eksekutiv opisa Michael Warapik i tokaut olsem husat ol kopra groa wantaim sek bilong ol we beng i no bin laik peim ol long bipo i ken go nau long PNGBC beng long wanem hap provins ol i stap long en na kisim pei bilong ol.

• Bihain tasol long dispela gutpela nius bilong ol kopra groa i ken go kisim mani long beng, Nesenel Kopra Produsas Asosiesen i givim tok luksave long CMB olsem bai i gat bikpela straik i kamap sapos CMB siaman i no kisim bek James Kiele long wok bilong em olsem eksekutiv opisa bilong CMB. Siaman bilong CMB Jerry Nalau i bin rausim James Kiele long wok bilong em long las wik.

Wanpela man husat i tok em i toktok makim asosiesen i tok disisen bilong rausim Mista Kiele em wanpela man tasol i mekim

Australia tambu long mit bilong Ingran bihainim longlong kau

AUSTRALIA long dispela wik i tambuim na rausim long ol self insait long stoa bilong em ol bif ol mit prodak ol i wokim long Ingran na 29 arapela kantri long Yurop.

I no-Australia tasol Nu Silan tu. Gavman bilong Australia i wokim dispela bikos ol i pret long longlong kau sik o long tok Inglis ol i kolim long "Mad cow" sik o BSE we i save kisim ol manmeri tu, sapos ol i kaikaim ol mit prodak ol i wokim long kaumit i gat sik long en. Na kau i kisim dispela sik taim ol i kaikaim mit i bagarap. Sampela manmeri na pikinini i kaikaim dispela mit i bagarap i kisim pinis sik longlong kau we taim ol man i kisim ol i kolim long "Jacob Disis".

Namba wan keis long dispela sik i bin kamap long Ingran long 1986 samting na gen long 1996. Mekim na sampela kantri olsem Australia, Nu Silan, Amerika na ol arapela moa i bin putim tambu na was long ol mit kaikai we ol i wokim long Ingran.

Ol binatang bispela sik i save kisim kru bilong man na bagarapim ol olgeta. Sistem na kru bilong ol bai bagarap na ol bai ino inap long tingting gut, ol bai go longlong na bodi bilong ol bai slek na ol i dai.

Bikos sik kau longlong ya i wok long kamap gen long Ingran, Australia, Nu Silan, Japan na sampela ol arapela kantri i putim tambu long ol mit prodak i kam long Ingran na 29 arapela kantri long Yurop.

Australia i tambuim moa long 250 ol mit prodak we em i save kisim long Briten na ol i putim tambu long en na rausim long ol self kaikai long ol stua. Sampela long ol mit prodak em long kon bif, franfet sosis, salami, livawes, pate na ol arapela prodak we i gat Yuropien bifmit long en.

Sampela long ol kantri we Australia i putim tambu long ol mit na ol arapela kaikai olsem em long Austria, Belgium, Croatia, Denmak, Frans,

Gemeni, Hangari, Macedonia, Nedalens, Nowe, Polan, Potugel, Rasia, Slovenia, Sweden, Swiselan, Gris, Ailen, na ol Isten Yuropien kantri.

Ol sampela kaikai we i stap long tambu lista em long ol bifmit prodak, ol bid sosis, ol spageti, ol lans mit nabaut, ol sup, ol stok kiub, ol grevi, ol megi sos, na kiub, ol salami, ol kuk pasta na ol sampela arapela moa.

Ol atoriti long Australia i tok ol i putim dispela tambu long lukautim ol pipel na i no ol kau o mit bisnis.

Ol ketel olsem ol kau na sipsip long Australia i klia long sik bilong longlong kau na ol i gat kliarens long dispela bikos i gat lo i stap long monitaim dispela samting long planti yia nau.

Ol atoriti i tok gavman bilong Australia i wari long ol pipel na i laik lukautim ol na olsem em i save putim tambu taim dispela sik bilong longlong kau i kamap gen long Briten na Yurop.

Wanpela dokta kilim planti manmeri dai

DOKTA Dai! Siriel kila Dokta Harold Shipman. Piksa i kam long Weekend Australian niuspepa.

Ol i bilip olsem Dokta Dai bilong Briten Harold Shipman i kilim dai pinis 265 ol lain husat i save sik na go long em long kisim marasin insait long las 25 krismas. Dokta Shipman i bin gat gupela nem na famili insait long planti krismas inap ol ripot i kamap olsem 250 peisen o ol siklain we i save kisim marasin long en i bin dai na ol i no save long wanem as. Antap long dispela em 15-pela husat ol i bilip olsem Dokta Dai i bin kilim ol dai las yia. Olgeta dispela lain em ol meri na krismas bilong ol i stap long namel mak.

Man ya i kisim nem olsem namba wan GP Dokta siriel kila long wol long longpela taim.


Ol ripot i tok planti ol pesen na famili bilong ol i save gut na kamap ol gupela pren bilong Dokta Dai.

Taim bilong em long go lukim ol pesen bilong en em long apinun taim em i save olsem nogat narapela lain i stap wantaim ol. Na em i save givim ol posin sut na kilim dai ol.

Dokta Dai husat i gat 54 krismas i stap nau long laip kalabus, stat long las yia yet. Na i gat pret olsem moa pipel i bin dai long han bilong em yet.

Dokta ya i holim rekot long wol olsem em wanpela man India ol i

kolim long Behran husat i bin brukim nek bilong 931 pipel long Uttar Pradesh namel long 1790 na 1840. Ol narapela em long Monsta bilong Andis, Pedro Lopez husat i bin bagarapim na kilim dai 300 yanpela meri na ol gel long Kolombas, Peru na Ikwado long 1980 na ol bin kalabusim em. Siriel kila Ted Bundy bilong Amerika i bin kilim dai 22 yangpela meri namel long 1974 na 1978. Na long 1980, Haus ov Horas long Ingran bilong Fred an Rosemary i bin kilim dai 12-pela viktim long em



• Dokta Dai, man husait kilim moa long 265 pipel i dai. Nau em i sanap long kot.

Environmen grup wari long helt na sefti bilong ol Johnson Ailan pipel

TUPELA grasrut environmen grup i tok tingting bilong United States ami long pasim Johnston o Kalami Ailan masin bilong kukim ol kemikol wepon bai i no gupela long helt bilong ol pipel olsem ol woklain, ol gavman woka na ol lain husat bai i stap long dispela ailan long bihain taim.

Ol grup i tok sapos ol i pasim dispela masin bilong kukim ol samting, bai i gat hevi long klinim ailan bikos sapos ol i bihainim narapela rot, bai kostim bikpela mani tumas.

Olsem na ol i tok i moabeta long gupela toktok na wokbung i kamap namel long ol han bilong mili-teri na ol gavman ejensi.

Kemikels Wepons Woking grup na Non Stokpail

Kemikol Wepons Sittsens Koalisen i bin givim ripot na ol toktok bilong ol long dispela samting i go long Environmen Proteksen Ejensi long San Francisco, Amerika.

Stat yet long 1990, masin ya ol i kolim long Johnson Atol Kemikol Ejen Distraksen Sistem i wok long kukim ol pipia i stap. Dispela ples i stap 700 mail sautwes longwe long Hawaii.

Grup i tok tingting bilong ami long klinim ailan i sut long sait bilong industri o bisnis na i no tingting long lukautim ol pipel na ol famili husat bai stap na wok long ailan long ol taim i kam bihain long en. Tu i no tingim ol waillap, pisin na ol pis na ol arapela abus samting i stap long solwara.

Planti Pasifik kantri i no amamas long Honolulu fising tok orait

PLANTI ol Pasifik Ailan kantri i no amamas long wanpela fising agrimen we ol i bin kamap wantaim long Honolulu miting long Hawaii.

Twenti foa kantri i bin stap insait long wanpela intenesenel konprens long tuna we ol toktok i bin sut long ol tuna pis we i stap long solwara bilong Pasifik na raun long wanpela hap solwara i go long narapela insait long

westen na sentrel ing. Pasifik.

Ripot i tok maski agrimen i no strongpela tumas, em ol Pasifik ailan deleet i mas glasim na skelim na tok orait long em long lukautim ol stok pis long rijen bilong ol.

Insait long foapela krismas nau ol i wok long toktok long kamapim wanpela agrimen long dispela samt-

ing. Konprens i bin pinis wantaim ol kantri i sainim wanpela ripot we aninit long en, ol bai kirapim wanpela komisin long was long ol tuna na ol arapela pis insait long rijen.

Ol ripot i tok Japan tasol i no bin sainim ripot taim Saina, frans na Tonga i no bin vot long namba wan raun na Korea i bin egensim.

Planti yangpela Australia pulim win nogut bilong petrol na bagarap

TOPSY na Walter Pukatiwara na pikinini Ivan i sindaun long wilsia. Dispela em long Uluru, biknem ston long Noten teritori we ol Aborijini pipel i gat bikpela luksave long pasin kastam bilong ol. Piksa i kam long Weekend Australian niuspepa.

Ivan na brata bilong em Lindsay em ol yangpela asples Aborijini husat i gat 20 krismas.

Ol na ol papamama bilong ol i stap long Alice Springs klostu long ples we Uluru Rok, em dispela biknem santu ston we ol Aborijinis pipel i bilip olsem em i santu na i gat ol spirit bilong ol dai tumbuna bilong ol long en. Yulara risot taun we Uluru i stap loong en i pulim planti tausen turis long wol i kam long lukim em (Uluru) long olgeta yia.

Walter Pukatiwara em i wanpela Aborijinis sief na papagraun long Uluru tasol ol i stap long narapela sait bilong Yulara wantaim samting olsem 160 Aborijini papagraun komyuniti.

Komyuniti ya i gat hevi yet long wanem planti ol yangpela pikinini i save smelim petrol na dispela i bagarapim ol. Mekim na planti bilong ol i no inap long wokabaut na ol i gat ol hap bodi bilong ol i bagarap.

I gat 12 manmeri husat i pulim win nogut bilong petrol na nau kamap longlong o kisim sampela bagarap ikong olgeta hap bodi bilong ol na dispela lain i save raun nating longn rot i stap o sampela taim wokabaut wantaim hap stik o raun nating.

Dispela piksa em wanpela bilong ol dis-pela yangpela husat savce smelim petrol long kamap spakman meri tasol dispela pasin bilong ol i tanim bek na bagarapim planti bilong ol pinis.

I gat 17 narapela yangpela manmeri long Sentral Australia i i kisim bagarap long bodi bilong ol bihain long ol i smelim petrol.



• Topsy na Walter Pukatiwara long ples Uluru wantaim pikinini man bilong tupela husat i kisim bagarap long lek na i no inap wokabaut bihain long em pulim win nogut bilong petrol. Planti arapela i kisim wankain bagarap long pulim win nogut long petrol na ol i stap bagarap na i nogat wok bilong ol. Foto: The Weekend Australian.

Fiji Hai Kot surukim kot bilong Speight

Suva, Fiji:
Hai Kot long Fiji long las wik i bin rausim rikwes i go long kot bilong saspensim trail kot bilong ku lida George Speight long kamapim trabel long kantri long Me 19 las yia.

Ol ripot i tok mekim na i luk olsem ol sas egensim em inap kamap wara nating.

Hai Kot long las wik Fonde i bin rijektim ripot bilong Stet Prosekyuta long surukim enkwairi we bai ol i givim evidens long ol sas egensim Mista Speight na nainpela poroman bilong em husat i bin go pas long Me 19 hevi long Fiji las yia na ol bin rausim gavman bilong Mahendra Chaudhry. Kot long dispela inap

stat long las wik Januari 3, 2001.


Sief Majistret Salesi Temo em i tok strong long Stet i mas soim ol witnes long Suva kot na ol bai glasim na skelim sapos i gat inap evidens long kisim Mista Speight i go long Hai Kot.

Ol saveman i pret olsem trison sas (sas ol i save putim long

man husat i wokim bikipela rong long kantri) egens long Mista Speight i klostu pundaun bikos ol plis na prosekyuta i no karimaut gut wok na olsem ol i nogat inap evidens.

Ol prosekyuta long dispela kot i tok Sief Majistret temo em i wansait na sapotim Mista Speight. Na pri trail kot i soim dispela long ples klia.

NATO i wok long kilim ol soldia o? Wok painimaut i mas kamap



• Antonio Gonzales Lopez i bin dai long sik kensa bihain long em i givim sevis long Bosnia. Piksa i kam long *The Weekend Australian* niuspepa.

Fiji sot long ol dokta na nes

Fiji:
Helt sevis long Fiji i wok long bungim hevi taim moa dokta na nes i wok long lusim kantri bihainim hevi we kantri i bin gat long las yia.

Medikel Superintenden bilong Koloniel Wo Memorial Hospitel Dokta Salimoni Tuqa i tokaut long dispela samting long dispela wik.

Dokta Tuqa i tok Helt Ministri i tingting long kisim ol Filipino dokta long wok long Fiji long strerim hevi long sot long ol dokta, nes na ol arapela eria long haus sik.

Wes Papua, Irian Jaya: Kot

Faipela Wes Papua bruk lus lida bai i kot klostu taim long ol trabel we i bin kamap long Jayapura bihainim pasin bilong sanapim fleg bilong Wes Papua long las Desemba na selebretim independens bilong ol, tasol Indonesia i no luk-save long en.

Bos bilong ol plis long Jayapura Superintenden D. Suripatty i salim samon kot pepa i go long faipela lida na em ol long Reveren Obet Komba, Murjono Murib, Yapet Yelemaken,

Reveren Judas Miyage na Emilia Yigabalom.

Plis long Jayapura i bin holim dispela faipela man long Desemba 18 wantaim lida bilong ol husat i stap nau long kalabus.

Bos bilong Wamena prosekyutas opis N Simanjuntak i tok faipela ya i stap nau long opis bilong em na wetim kot. Na sapos kot i painimaut olsem ol i rong long laik kamapim hevi long kantri. ol i ken kalabus long laip o kisim 20 yias.

Deputi plis komisina Homelo wari long nupela spesel plis fos lain

Solomon Allan:
Deputi Plis Komisina bilong Solomon Ailan John Homelo i gat wari long ol i wok long kisim planti tumas ol eks militen long tupela grup (Malaita Igel Fos na Isatabu Fridom Muvmen) olsem ol spesel plis fos.

Mista Homelo husat i bin stap long malolo na nau tasol i go bek wok i no wanbel long lukim olsem ol i putim planti long ol dispela lain (eks militen) long supavaisim wok bilong lusim ol gan na

ol arapela samting bilong pait long en.

Em i tok aninit long Taunsvil Pis Agrimen, ol inap long kisim 100-pela eks militen long tupela grup long wok long spesel plis operesen.

Mista Homelo i askim ol atoriti husat i kisim ol lain long wok long tingting gut pastaim bikos gavman i mas katim baset long karamapim dispela wok.

Ol dispela spesel plis operesen lain i wok long kisim trening na ol arapela i karimaut wok pinis.

Ol bikman long gavman i egensim triti

Sidni, Australia:
Sainim pis triti wantaim ol Aborijinis em i westim nating mani na taim bikos dispela bai brukim tasol ol blek na wait pipel long Australia, sampela sinia gavman minista long Australia i tok.

Ekting Praim Minista John Anderson na nupela Aborijinel Afeas

Minista Philip Ruddock, tupela i no wanbel long wanpela proposel o ripot we ol Aborijini lida i singaut long en long wanpela fomol triti i mas kamap.

Ol grup olsem Aborijini na Tores Strait Ailenda Komisin i wok long bungim sapot na tingting long ol Aborijini pipel long

kamapim triti wantaim ol wait pipel bilong Australia.

Mista Anderson i bin tokaut olsem em i egensim dispela triti ol i singaut long en na em i westim taim na mani long dispela samting.

Em i tok proposel bilong triti bai kamapim hevi long ol gutpela wok go het i kamap pinis long sait

bilong kamapim pis, sekan na bel isi pasin.

Nupela Aborijini Afeas Minista Mista Ruddock i tok triti em samting we ol i save wokim wantaim ol ausait kantri na dispela i no gutpela bikos em bai sepere-tim tupela pipel (ol blek na waitman bilong Australia yet.)

Ais i wok long bruk long Alps

Longdon:
I gat wari olsem sampela long ol biknem ski risot long Yurop bai bagarap bikos ais i wok long melt long dispela hap.

Ol ripot i tok dispela samting i wok long kamap long Alps, biknem maunten risot eria we ol turis long wol na ol arapela pablik i save go long en long malolo gut na ski.

Ol ripot i kam long ples klia long wanpela saientifik komprens i tok dispela grinhaus efek we wol i tuhot, ol ais tu

long dispela hap we long bipo yet i kam inap nau i save stap tasol i wok long melt o tanim i go wara nau.

Ripot i tok taim ais i mekt, ol risot i stap long bikipela hevi bikos graun bai bruk na ol ston bai pundaun i kam daun tu.

Dokta Charles Harris bilong Cardiff Yunivesiti i bin autim dispela tok lukaut na wari i tok i gutpela long harim ol dispela kain ripot na ol atoritit na pablik i ken redi gut bipo ol neturel disasta i kamap.

Em i tok ol temperetja long planti risot eria i wok long go antap na ples i pilim hot, i no olsem long bipo.

Ko nprens i bin harim tu olsem ol eria long Sierra Nevada long sauten Spain i go inap long ol maunten long noten Skendinevia em ol i stap long wankain hevi bihainim wol i wok long go hot olgeta.

Dokta Harris i tok bikipela eria we hevi i stap long en em long ol Alps maunten we i karamapim Swiselan, Austria, Frans, Gemeni na Itali.

NATO, Yurop/Amerika:

Nainpela NATO kantri husat i gat ol lain bilong ol long ami na ol i bin pait long Bosnia na Kosovo i karim ol wok painimaut o askim NATO (Not Atlantik Triti Ogenaisesen) long wokim wanpela wok painimaut long helt bilong ol soldia bikos planti bilong ol i wok long dai long kensa.

Bihainim ol ripot, Frans, Belgium, Holan na ol arapela NATO kantri long Yurop i ripotim olsem mak long ol soldia i bungim sik kensa na i dai husat i bin wokim sevis long Bosnia na Kosovo i wok long go antap.

Ol kantri we i karimaut ol investigesen long dispela samting em long Itali, Frans, Spain, Portugel, Finlen, Teki, Gris, Belgium, Nedalens o Holan na Kroesia.

Difens Ministri long Belgium i go pas long dispela bihainim dai bilong nainpela pis kipa husat i bin wok wantaim NATO ami long Bosnia. Sampela arapela soldia tu long foma Yugoslavia i kisim sik kensa i stap. Ripot i tok long dispela, faipela i bin dai.

Ol ripot i tok sik kensa na liukemia we ol NATO soldia i dai long en i wankain olsem dispela we ol soldia bilong Amerika i bin gat taim ol i stap insait long Galp Wo long Midel Is na ol i karimaut Operesen Deset Stom.

Ripot i tok mak bilong sik ya em ol i save tait tru, dabel visen, hetpen na ol arapela moa olsem.

Ol ripot i tok kemikol uranium we ol i yusim long strongim ol katres, ol bom na ol kes bilong ol misail i save kamapim sik liukemia na ol arapela sik kensa long liva na kidni.



Alotau statim dat kompetisen

DAT RIPOOT

NUPELA dat asosiesen insait long Sauten rijen, Alotau Dat Asosiesen (ADA) bai statim pri-sisen bilong em long dispela wiken. Olgeta gem bilong em bai kamap long Masurina Lodge.

Interim presiden bilong ADA Mojech Selsel i tok asosiesen bilong em i gat bikpela wok long redim ol samting bilong Sauten Rijen Dat Sempionsip we bai kamap long Milen Be long Septemba.

Mista Selsel i tok i gutpela long ADA tu i mas statim kompetisen hari-ap na redim ol yet to long go stap insait long rijonel sempionsip.

Em i tok em i amamas tru long lukim bikpela namba bilong ol tim i

soim laik long stap insait long resis. Ol tim i soim laik i kam long East Cape, Wagawaga na go long Daio. Moa long 20 tim bai stap long dispela 2001 ADA kompetisen.

Mista Selsel i tok bai i gat wanpela miting long makim ol opisel bilong raunim ADA kompetisen long dispela yia. Sampela ol klab i tokaut pinis long stap em Sunam, Eda Lai, Ahioma, Naura, CIS, Sharks, Waigani Estate, Harbours Bot, Red Flights, High Flyers na Samarai Steamers.

Em i tok wanem ol tim i laik stap insait long resis i mas givim nem. Rejistresen fi bilong tim long knockout em K10 na rejistresen bilong wanwan pilaia em K1.00.

Ol Australia i no amamas long soka fil

OFC KLAB SEMPI-ONSIPI RIPOOT

KEPTEN bilong Wollongong Wolves long Australia, Matt Horsley, rot bilong go pilai long Wol Klab sempionsip i no isi olsem sampela man i ting.

Horsley i autim dispela toktok long AAP olsem Wolves i mas winim dispela ol gem long kwalifai long Wol Klab sempionsip long Seville, Spain, long mun Ogas.

Kepten bilong sempion klab long Australia i no lukdaun long ol birua

tim bikos em i save em bai hat bikos long san i hot na tu ples pilai i no gutpela tumas long Pot Mosbi Ragbi Lig oval.

Em i autim wari bilong em olsem olgeta 27 gem bai kamap long wanpela fil tasol. Na dispela bai bagarapim tru antap bilong soka fil. "Olgeta pilaia bilong Australia i stap gut. Nogat wanpela bikpela hevi i kamap," Horsley i tok.

"Mipela bai bungim strongpela salens tru long ol birua tasol mipela laik kamapim gutpela stat.

Wolves i salensim Tonga long Tunde na bai bungim Laugu bilong Solomon Islands long tude. Wolves i malo wantaim ol arapela tim long pul A. Ol arapela tim em Foodtown Warriors (Fiji), Napier City Rovers (Nu Silan) na YumiFM Unitech (PNG).

Na long Pul B em Tupapa (Cook Ailan), Pansa (American Samoa), Titavi (Samoa), Tafea (Vanuatu) na AS Venus (Tahiti).

Tupela top tim long wanwan pul bai stap

insait long semi fainel we bai stat long Januari 20.

Horsley i tok Australia i stap long strongpela pul we tripela tim, PNG, Fiji na Nu Silan, i strong stret insait long rijen.

Kepten bilong Australia i tok em i no ting tim bai win isi wantaim bikpela skoa bikos soka em wanpela fani gem na kainkain samting i ken kamap ya.

Sapos Wolves i kwalifai long Spain, ol bai surikim tupela gem na bai pilai bihain taim ol i kambek long Spain.

Bikples Bogia amamas krismas wantaim soka

RUREL SPOT RIPOOT

OL pipel bilong Angoram Sensis Divisen long bus bilong Bogia i gat stail bilong ol yet long amamasim krismas.

Sampela bilong ol i tingting long kilim pik na mekim pati. Sampela ol i amamasim dispela de wantaim spot olsem soka, basketbal na volibal. Olgeta gem ya i kamap long Ukin-Barne fil.

Astingting bilong holim dispela kain pilai ya em long bungim olgeta yut na luksave long ol yet na serim ol kalsa, kastom na prensip long erfa bilong ol.

Man husat i go pas long oganaisim dispela ol gems ya em long Arnold Mapura i tok, longpela taim tru ol pipel bilong em long ol ples olsem, Almami, Degit, Wankin, Josephstaal, Zukin na sampela moa ples i no save bung wantaim olsem na em laik lukim olsem ol yut i mas save olsem ol man tu ya.

Em askim wanpela lokel kampani long Madang. "Momase Schools Supplies" long givim ol tropi bilong soka, basketbal na volibal we na wanpela kap ol kolim olsem, Kas/Mapura Kap.

Mapura i tok long long resis bilong soka i gat 11-pela tim, 8-pela long basketbal na 6-pela long volibal. Na kompetisen bilong ol meri, 4-pela tim i salens long basketbal na 4-pela tim i salens long volibal.

Long kik bilong ol man Yangs winim Not 3-2 na autim nambawan prais em long Kas/Mapura Kap wantaim K150 prais mani. Not kisim rana-ap prais em long tropi na K100.

Ol meri em Duks winim Yangs. Mapura i tok olsem dispela kain pilai yet olsem bai kamap long olgeta yia.

Soka bai bungim ol pipel

SOKA RIPOOT

OL pipel insait long Tsunami Disasta Eria long Aitape bai yusim soka olsem rot bilong kamapim bel isi namel long ol komyuniti we i kisim bagarap long dispela bikpela tait bilong si.

Long go het long strongim dispela wok, European Economic Community i givim K24,000 i go long ol pipel long dispela eria. Bikpela tingting long wokim wanpela wol klas soka fil long ples Warapu na tu baim bail na net bilong golmak.

Siaman bilong Yut Soka insait long kantri Gabriel Pise i go pas long kisim dispela mani na i bin givim dispela mani long ol pipel las wik long Vanimo taun.

Pise i tok K10,000 em ol bay usim long statim wok bilong dispela nupela soka fil. Ol masin bilong mekim dispela wok i stap pinis long Warapu.

Bihain ripot bilong namba wan hap bilong projek, narapela K10,000 em ol bai yusim long bai soka bal, net,

kona fleg, referi fleg na wisel bilong ol referi.

"Bikpela astingting hia em long yusim soka long bungim ol pipel bilong Malolo, Arop, Warapu na Sissano to wok olsem wanpela grup," Em i tok.

Pise i tok wok bilong em long statim projek, na bihain givim dispela wok i go long han bilong ol viles piepl long lukautim.

Gabriel Pise i bin mekim wankain ol wok bilong soka long hap bilong Oksapmin na Telefomin we nau ol i gat intanesenel soka fil. Na tu soka i wok long kamap strong tru long dispela tupela eria.

Em i tok ol yangpela bilong ol dispela tripela ples bai sapatim long wok. Bai gat kompetisen bilong ol sinia man, meri na skul soka. Ol i gat tingting long pinisim olgeta wok na opisel opening bilong soka fil bai kamap long Septemba.

Ol bai salim askim i go long Oksapmin na Telefomin long putim tim long salens long taim bilong opim dispela fil.

YumiFM sapatim Unitech long OFC tonamen



• YumiFm Spot edita lamutu Kere i givim sponsasip agrimen i go long Unitech menesa John Wiley.

HENRY MORABANG i raitim

NAMBA wan TOK PISIN radio stesin, YumiFM, i kamap olsem bikpela sponso bilong Unitech soka klab we nau i stap insait long 2001 OFC klab sempionsip long Pot Mosbi.

Jenerel Menesa bilong PNGFM, mama kampani bilong YumiFM, i tokim ol pilaia na sapota olsem dispela helpim bilong radio stesin nau bai kamapim gutpela pren wantaim soka klab bilong Yunivesiti long Lae.

Nau nem bilong klab em YumiFM Unitech.

Em i tok "Taim nau i hat long painim mani long sponsasip.

OFC SOKA RIPOOT

Tasol nau em taim bilong givim samting bek i go long komyuniti.

"Tingting bilong Unitech long askim mipela em i gutpela long promotim klab long soka tonamen long rijonel level.

"Mipela bai lukluk long bihaintaim sapos klab i mekim gut long arapela ol tonamen."

"Mipela bai mekim inap Unitech i mas gat gutpela yunifom, trening siot na ol kain samting sponso i givim long mekim ol pilaia i amamas," Aitsi i tokim Wantok.

John Wesley Gonjuan i bekim toktok bilong Aitsi na tok olsem em i amamas tru long gutpela sapat bilong YumiFM.

I tru tim bilong Unitech i gat planti ol hevi ol i painim taim ol i laik kam long Pot Mosbi tasol ol i trenim gut. Ol pilaia i bung 4-pela wik bipo long dispela tonamen tasol ol arapela pilaia long Solomon Ailan nogat.

"Mipela i no wari long sais bilong ol, mipela i gat save long pilai soka wankain olsem ol ya.

"Mipela tu i nogat ol pilaia i gat intanesenel eksperiens tasol mipela bai kamapim gutpela salens long ol birua tim.

Unitech i no stap long hotel olsem ol arapela tim. Ol i slip long Nesenel Risers Institut (NRI) long Waigani. Ol i stap na nogat wanpela samting i bagarapim tru tingting bilong ol ya.





• Unitech tim husat i karim nem bilong PNG long Osenia klap sempionsip. Oi i kamapim namba wan gem tru tasol oi i lus long Nu Silan tim, Napier City Rovers, 2-0.



• Napier City Rovers bilong Nu Silan husat i winim Unitech long namba wan gem 2-0.




• Sempion klap bilong Australia Wollongong Wolves i kisim poto. Oi i gat bikpela sans long winim K3 milien prais mani.



• Lotoha'pai tim bilong Tonga i sanap kisim poto bipo long oi i salensim Wollongong Wolves bilong Australia. Oi i lus 16-0.



• Oi boi ros long Solomon Ailan, Laugu United i sanap kisim poto. Oi nilim stret Foodtown Warrior bilong Fiji 3-1.



• Tupela tim, Lotoha'pai bilong Tonga na Wollongong Wolves bilong Australia i sanap long taim bilong statim pilai. Oi poto: IVAN BAYAGAU.



IKEN WOKIM GUTPELA SAMTING LONG YU

Taekwando statim resis neks mun

TAEKWANDO RIPOT

PAPUA Niugini Taekwando Kaunsil (PNGTC) bat statim 2001 sisen wantaim bikpela resis bilong Presiden Kap long Pot Mosbi long neks mun.

President bilong PNGTC Jamuga Stone i tok resis bilong Presiden Kap bai kamap long Februari 17-18. Kompetisen ya bai ran long tupela de na ol bai makim ol paitman long makim taekwando long Arafura Gems na tu bikpela sempionsip long Las Vegas, Amerika we

bai kamap long Februari 28 i go long Mas 4.

Mista Stone i tok ol lain bai resis long Presiden Kap bai kam long Goroka, Lae, Madang, Rabaul, Buka, Sogeri, Rigo na Pot Mosbi.

Wanpela nupela asosiesen, Kikori tu bai soim pes namba wan taim long dispela sempionsip.

Em i tok em i guria stret long lukim wanpela tim bilong Kikori insait long Galp provins bai salim tim. Sinia Instrukta Peter Tongi husat i wanpela studen bilong Jamuga yet bai kosim dispela tim.

Long dispela tonamen, olgeta klab opisel na instrakta bai sainim wanpela agrimen olsem ol i memba long PNGTC. Semtaim tu, olgeta wanwan asosiesen bai yusim dispela sempionsip long traim stretim hevi i wok long bagarapim nem bilong spot bilong taekwando.

Em i tok wanem ol asosiesen i memba long PNGTC i ken stap long dispela Presiden Kap. Jamuga Stone i singaut tu i go long ol klab i mekim wantaim PNG Taekwando Asosiesen, em ol lain bilong Edward Kassman long kam salens long dispela tonamen.

Em i tok olsem mipela i mas statim nupela sisen. Lusim wankain ol belhevi na noken tingting tumas na kam traim resis long strongim dispela sempionsip.

PNGSC i makim Scott Vavine bilong PNG Spot Komisin long kamap olsem tonamen dairekta.

Bai i gat sampela ol paitman long Australia tu bai kamap. I gat sampela ol kampani i soim pinis laik long stap na sapotim dispela tonamen.

Wanem ol paitman i laik resis ol i mas baim K30 na na ol lain i no memba long asosiesen i mas baim K40.

Kavieng kirapim gen ragbi lig

IAN KAKARERE i raitim

I GAT plen nau long traim statim gen ragbi lig insait long Niu Ailan long 2001.

I bin i gat wanpela miting long Kavieng Hotel long Tunde long traim kisim tingting bilong ol pilaia na opisel long statim dispela kompetisen.

Kavieng i gat nem long pilai sofbal, tas ragbi, soka na ragbi yunion. Ragbi Lig tu i bin kamap longpela taim i go pinis tasol i dai bikos planti ol pilaia i givim baksait bikos long nogat gutpela sapot i kam long sponsa na PNGRFL opis long Pot Mosbi.

Presiden Wesley Have i tok las gem bilong ragbi lig long Kavieng i bin kamap long 1998 wantaim 6-pela klab.

Em i tok wanem ol klab i laik resis i mas givim nem

RAGBI LIG RIPOT

bilong ol nau, na stat long painim mani long baim registresen fi. Ol 4-pela klab i soim laik em Kopkop Brothers, Kanai, Sea Eagles na Raval Warriors.

Tarangau na CDC Contry i tingting tu long putim wanpela tim long dispela yia.

Narapela miting bilong ol bai kamap long neks wik Fonde. Dispela miting bai toktok sapos kompetisen bai go het o nogat.

New Ailan Ragbi Lig i bin kamapim sampela gutpela pilaia tru long bipo. Na wantaim ol nupela blut bilong nau, ol i ken statim yet wanpela gutpela na strongpela tim bilong salens insait long Niugini Ailan intra zon sempionsip.

Ol arapela memba bilong komiti em Graham Walker vais presiden, Pirut Sebulon sekretari na Kevin Wapa em tresera.

Yunitek go daun wantaim bikpela sapot

YAKAM KELO i raitim

YUNITEK soka tim bilong Lae i putim kamap wanpela bikpela na strongpela pait tru egensim Napier City Rovers bilong Nu Silan we planti PNG sapota i amamas tru long lukim gutpela gem bilong ol. Maski PNG FM Yunitek i lus 2-0 long fultaim, dispela i bin wanpela top gem tru planti sapota i laikim tru long lukim bikos planti taim Yunitek i bin kamapim ol bikpela pret long gol mak bilong Napier City insait long dispela bikpela Osenia klap sempionsip long Tunde dispela wik long Mosbi.

Namba wan gol bilong Nu Silan tim i bin kamap 5-pela minit insait long gem taim Yunitek i laik traim aut ol kain stail pilai em. Dispela gol i opim ai bilong Yunitek na ol i lokim banis na planti opsait tru long ol fowet bilong Nu Silan klap ya. Opsait teknik bilong Yunitek tasol i bin holim bek planti sans bilong Napier Rovers long traim apim skoa i go moa klostu long Wollongon Wolves bilong Australia husat i bin nekim Lotohu'apai bilong Tonga 16 nil skoa long fultaim.

Taim pilai i stat, planti sapota long sait sait i singaut, mekim samting stret. Sampela i singaut, maritim ol. Na planti kain kain toktok bilong soim sapot long Yunitek tim.

Long lukluk bilong pablik sapot, namba 19 na namba 8 i bin pilai nais tru na olgeta taim bal i go long lek bilong tupela, yu ken harim bikmaus na nois bilong ol sapota long sait sait.

Gem bilong Yunitek long dispela taim em yu ken lukim ol i ronim bal long

SOKA RIPOT

graun na salim klostu klostu long narapela narapela insait long ol liklik spes o aninit long lek bilong ol longpela Nu Silan lain ya. Taim ol i kamap klostu long golmak bilong Napier Rovers, ol i save laik painim ol liklik hap spes bilong straikim bal. Tasol ol longpela lek bilong ol Nu Silan lain i save rausim bal na tu golkipa bilong ol em wanpela pusiket stret na i save sevim ol bal i kam long golmak bilong em.

Yumi save pinis olsem ol PNG em ol sotpela lain ya na taim ol i laik traim ol longpela kik, ol muruk bilong Nu Silan i save winim ol dispela bal isi tru na holim ol dispela bal i stap strong long lek bilong ol yet gen.

Sapot long Yunitek tim i bin bikpela moa na ol tim bilong narapela Pasifik kantri tu i soim bikpela sapot tru na paitim han long ol boi bilong mipela stret. Planti ol


opisel na ol bikman tu i amamas long lukim naispela gem bilong ol Yunitek manki bilong Lae. Golkipa bilong Yunitek Rony Nembago i bin wok hat tru long sevim ol kik bilong Napier Rovers long golmak bilong ol.

Wanpela biknem kosa i bin tokaut bihain long pilai i pinis olsem Yunitek i putim kamap gutpela pilai tru. Tasol wanpela samting ol i sot long em em long gutpela eksperiens kosa husat i gat intanesenel trening na save long kain bikpela pilai olsem. Long dispela as Yunitek i pilai olsem wanwan man wantaim wanwan stail. Tasol sapos ol i save long bal bai igo long husat na go gen long husat inap man ol i makim long em i mas redi long pinisim ron bilong bal, dispela inap lukim Yunitek i kamapim skoa long golmak bilong Nu Silan tim. Bikman ya i tok ol i kolim dispela kain stail bilong gem we em i tok-

tok long en em, tektikel futbal.

Bikman ya i tok em i save long ol nesenel kosa bilong Lae olsem Ludwig Peka na Richard Nagai we ol i gat dispela save, tasol i no kosa bilong Yunitek. Kosa bilong Yunitek em Eric Petrus, wanpela olupela PNG soka pilaia na i save pilai oltaim wantaim Mosbi Guria inap em i go pilai wantaim PS United. Em i go long Lae na pilai liklik taim wantaim Yunitek na kamap kosa bilong tim.

I tru Eric Petrus i nogat eksperiens bilong kosa tasol i luk olsem planti pilaia bilong Yunitek tu i nogat dispela kain save na eksperiens bilong kik insait long kain bikpela intanesenel soka resis olsem long bipo. Planti i no bin kik egensim ol pilaia bilong narapela kantri tu long bipo i kam inap dispela em namba wan taim bilong ol.



• Ol pilaia bilong Nu Silan i trening bipo ol i bungim Unitech (PNG).

Dispela mun em laspela mun bilong baim afiliesen fi bilong boksing

BOKSING RIPOT

OL boksing senta i laik stap insait long nesenel boksing sempionsip i gat dispela mun tasol long baim afiliesen fi bilong ol.

Dispela sempionsip ya bai kamap long Nesenel Spots Institut long Goroka long mun Februari 24-25.

Nau yet i gat 12-pela asosiesen i soim laik long stap insait long dispela sempionsip. Bipo long sempionsip bai i gat wanpela Olimpik Solidariti Boksing Kos i kamap. Dispela kos em bilong helpim ol boksa na ol teknikel opisel long save gut long rul bilong pilai boksing.

Samting olsem 40 man i soim pinis long stap insait long dispela boksing kos. Dispela kos bai toktok long kosing, refereeing, jasing na wok edministresen. Ol senta i laik salim ol man long dispela kos i mas salim aplikesen bilong ol hariap.

Wanem ol senta i laik stap long kos na tu long sempionsip i mas baim afiliesen fi long nesenel boksing bodi, PNG Amatsa Boksing Yunion (PNGABU).

I gat wanpela komiti ol i kolim Millenium Boksing Sempions Ogenaising Komiti i kamap pinis long

Goroka long lukluk long wok redi bilong dispela kos na sempionsip. Nem bilong ol komiti em Samu Sasama (siaman), namba tu siaman em Frank Amoiha, sekretari Peter Aglua, tresera Kila Dick, teknikel opisa Clement Matona na kodineta em Tim Gawot.

Wok bilong dispela komiti em long painim mani, stretim haus slip, trenspot na edministresen bilong dispela kos na sempionsip.

Komiti i askim olgeta senta long salim kwik nem bilong ol boksa na divisen em ol bai pilai so ol i ken redim trenspot na haus slip bilong ol.

Arapela singaut i go long ol asosiesen olsem Bougenvil, Tabubil, Alotau, NCD na Port Moresby long tokaut sapos ol bai salim tim yet long Goroka o nogat.

Tingting bilong holim boksing sempionsip long Goroka nau i pulim planti man tru. Dispela spot klostu i laik dai tasol wantaim ileksen bilong Frank Amoiha olsem presiden, planti ol yangpela long Isten Hailens i tingting long kamapim nem long dispela spot.

Clement Mantana i sapotim dispela toktok na tok olsem spot ya klostu tru i dai tasol ol i kamapim gen interes insait long provins.



IKEN WOKIM GUTPELA SAMTING LONG YU

Graun em strong bilong pipel

OLGETA manmeri i gat wanwan asples bilong ol yet insait long PNG sosaiti. Dispela em ol tumbuna graun tru bilong ol we ol i ken wokim gaden, sanapim haus long graun na raun long bus na wara na kism wanem samting i stap long en.

Planti bilong yumi ol PNG lain i save lusim ples na go wok o skul nabaut long ol taun na arapela provins. Na long taim bilong holide, yumi save laik go bek long ples bilong yumi na kism malolo inap taim bilong stat wok o go bek long skul orait yumi go bek gen.

Ol lain bilong yumi long ples tu i save stap long ples olgeta taim. Na wanwan taim ol bai go long taun o siti long salim ol kaikai long maket, baim ol samting long stua, o go lukim ol pikinini o famili husat i wok i stap long taun. Bihain bai ol i go bek long ples.

Ples bilong yumi i sanap olsem wanpela bikpela samting long sindaun bilong yumi bikos em i ples bilong yu stret we yu ken pilim fri long mekim ol samting bilong kamapim gutpela sindaun na amamas long yu yet na ol famili bilong yu.

PNG em i kantri we ol pipel i gat graun na asples tru bilong ol insait long provins wanwan. Taim narapela man i save laik go sindaun antap long graun o mekim wanpela wok antap long graun bilong narapela man, bikpela kros na pait i save kamap. Sampela taim bikpela kot i mas kamap bikos long trabel na kros pait we i kamap pinis.

Insait long PNG, yumi lukim planti bikpela kros pait na trabel we i kamap bikos long graun tasol. Ol bikpela kampani i save go brukim ol graun long kism gol na kopa, oil, katim diwai o wokim ol plentesen o sampela bikpela bisnis.

Na ol asples i save kwiktaim ron kam ausait na salensim ol dispela kampani we ol lida bilong mipela wantaim Gavman i save kam sindaun wantaim mipela na kampani na paitim toktok i go kam inap wanpela wanbel i kamap. Orait kampani i go bek long mekim wok bisnis bilong em na ol asples i kism sampela kain pemen o mani long mekim ol i wanbel long lusim graun bilong ol i go long dispela wok bisnis i ken stat.

Long PNG yumi wanwan i papa long graun na yumi stap wantaim graun bilong yumi long planti kain kain rot. Graun i givim kaikai long yumi, graun i givim haus long yumi, graun i olsem bun na strong bilong yumi.

Tumbuna bilong yumi i sindaun antap long ol dispela graun i go inap long yumi ol pikinini tumbuna i kamap na holim gen.

Long ol bikpela siti na taun long wol, planti lain i nogat graun bikos graun i bilong Gavman. Gavman i papa graun long na mekim mani long en we mani i go bek long kirapim ol wok na sevis long pipel. Sapos wanpela man o meri i laikim graun, ol i mas baim. Dispela em ol bisnis lain tasol i save baim graun na sanapim haus bilong ol antap long en.

Sampela manmeri tude insait long wol i nogat graun bikos ol i bikpela long siti na taun na ol bai i stap olsem tasol na kism strong long mani ol i gat long pasbuk na long wanem bisnis bilong ol.

Taim ol i save harim stori bilong mipela olsem mipela i gat graun we mipela i papa long en, ol i no save bilip tru. Na ol bai askim planti kwesten tru long wanem as na yumi i papa long graun.

Planti kantri we yumi i gat ol asples em yumi i papa long ol graun olsem planti kantri long Pasifik.

Sampela kantri i save wokim strongpela lo bilong graun long wanem rot ol i mas yusim graun bilong ol. Sampela em ol i tok, Gavman i papa long graun. Sampela em ol pipel i mas rejistaim graun bilong ol long soim stret graun bilong ol na bihain ol i ken putim long rent i go long Gavman o ol bisnis long mekim wok antap long en.

Na ol pipel bai i stap tasol na kism mani long olgeta mun o yia. Ol manmeri tu bai mekim mani bikos ol bai gat wok taim ol bisnis i kam mekim wok antap long graun bilong ol.

Long PNG Gavman i save tok mipela i gat bikpela graun tru we ol bikbus na maunten na tais i karamapim. Taim yu ron long balus

bai yu ken lukluk i go daun na lukim planti bikpela maunten na bikbus na i gat wanwan haus i stap namel long ol dispela bikbus na maunten. Em ol i papa bilong dispela hap graun na ol i stap long en.

Mi bin ron long balus lusim Mosbi na i go long Wau long Morobe provins na taim balus i ron long sait bilong Bereina na lusim i go antap long Tapini long Goilala eria, mi ken lukim ol haus i sanap long wanwan hap i stap. Smok bilong paia i kirap namel tru long ol bikbus na maunten na mi save olsem ol manmeri i mekim gaden i stap. Sampela bilong dispela hap em i longwe tru long go long ol taun na stesin olsem Wau na Tapini o long Mosbi na Lae. Ol i save wokabaut wanpela wik sampela long kamap long ol dispela stesin long baim ol samting ol i sot long en olsem suga, sop, sol na kolos bilong werim. Ol tu i no inap mekim gut mani long wanem samting ol i kamapim long graun bilong ol bikos maket i longwe tru long salim ol abus o gaden kaikai ol i kamapim. Tasol ol i gat planti kaikai long kaikai na ol i no sot long wanpela samting bilong bodi long mekim ol i stap laip.

Tru ol bai bungim ol sik olsem malaria na arapela sik bilong ples na haus sik bai i longwe long ol i kism marasin. Tasol ol bai i gat sampela bus marasin i stap we ol bai kism long stretim sik bilong ol.

Gavman tu i save laik kirapim ol sevis long mekim laip bilong ol pipel i isi long ol ples bilong mipela. Tasol bikos ol pipel i save gat bikpela salens long Gavman long noken tasim graun bilong ol. Olsem na i hat long Gavman i wokim rot o bris long bungim ol pipel i go isi long ol taun long maket o bringim ol sevis olsem haus sik na skul i go long ol.

Ol pipel i save sanap strong tu long askim mani pastaim long Gavman i ken tasim graun bilong ol. Tude ol manmeri i save gut long kompensesen na dispela em Gavman i mas stretim pastaim long ol i go het na tasim graun bilong ol pipel.


Planti ol saveman na ol lidaman i tok, kompensesen tasol i save stapim planti bikpela developmen na sevis long kamap we inap helpim sindaun na laipstail bilong planti lain long ples. Tasol ating kompensesen i stap na stapim ol graun bilong mipela i stap gut bai mipela i ken raun painim abus long wara na bus, mekim gaden, yusim ol diwai na lip long mekim haus na mekim ples i stap gutpela.



• Noken ting olsem em meri nating. Tuwo lne husat i gat 3-pela krismas bilong Kami vies long Goroka, lsten Hailans igat namba tu long wokim gaden na kamapim dispela stail painap. Na em ibin putim aut dispela painap wantaim ol arapela kaikai long taim em wantaim ol femili bilong en ibin bung na kaikai long selebretim krismas 2000. Foto: SAPE METTA.



• Wanpela blokholda long Marinumbo ples i soim wanpela hap long wara we tait i brukim graun. Taim graun bagarap olsem, planti manmeri save kism taim stret. Planti taim wara save bagarapim ol gaden kaikai na haus bilong ol manmeri. Wankain samting i kamap long ples soi insait long Popondetta.




• Namba wan gret 8 greduesen long St Lawrence praimeri skul long Simbai. Dispela em Engliken skul.




• Flait sabsidi i bin helpim tru ol pipel bilong Binandere long groim moa kopi.



• Insait long bikpela kempen bilong stapim kros pait na birua egensim ol meri na pikinini, ol mama i pulim lain i go long palamen long soim bel hevi bilong ol.




• Bas namba 10 i kapsait na slip karangi bihain long em i bungim birua wantaim narapela ka long Mosbi.



• Lephon: Dispela em wanpela drama pilai we i tokaut long noken birua long ol meri na pikinini.

• Lephon: Praim Minista Sir Mekere Morauta i sanap namel long ol pikinini wantaim bilas bilong ol taim Praim Minista i opim wanpela pro-jeck long las yia.





Asua bilong mama



LONG bipo, bipo tru tupela manmeri i stap. Na tupela i gat wanpela pikinini man. Na dispela pikinini i kamap bikpela pinis na em yet i save wokabaut.

Na papa bilong em i wok liklik banara na i givim em bilong em i pilai pilai long en. Orait wanpela de ol i go long nupela gaden yam bilong ol, bilong klinim na stretim na sanapim stik bilong rop bilong yam i bihainim stik i go antap.

Na tupela papamama i wok long klinim gaden i stap na pikinini i go na sutim ol kru bilong yam long banara na ol kru bilong yam i bruk na pundaun nambaut, orait em i lap bikmaus na amamas nogut tru. Em i mekim olsem yet i stap na mama bilong em i ting, em i pilai nambaut na em i laip i stap. Na em i go het yet long klinim gras long yam i stap.

Papa bilong em i kirap na lukluk long pikinini bilong em, man, man, ol kru bilong yam i no isi long slip nambaut long graun. Em i tokim meri bilong em, lukim pikinini bilong yu, em i klinim gras na em i winim mitupela tru.

(Em i tok bokis long meri) na meri i ting tru na em i kirap lukluk ya no, kru bilong yam i

bagarap pinis na slip nambaut long graun.

Pikinini i ting tupela i no lukim mi, na em i go het yet long sutim kru bilong yam na bikmaus na lap na amamas nogut tru i stap. Mama bilong em i kirap na bikmaus tru long em na i paitim em nogut tru, em i tanim gen krosim man bilong em i spik. Yu tasol, asua bilong yu tasol, yu yet wokim banara na givim em orait em i bagarapim kru bilong yam. Na yutupela i no inap kaikai. Bai mi noken kukim kaikai binlong yutupela.

Painim bilong yutupela long gaden bilong yutupela yet na kukim orait kaikai. Em i krosim tupepla pinis em i go long haus na em i kukim kaikai bilong em yet pinis na em i kaikai.

Orait papa i singautim pikini-

ni bilong em na i tokim em. Mama i krosim mitupela ya olsem na mipela i noken i go long haus, bai mipela mas i go long wanpela hap i nogat man i stap long en.

Orait pikinini i harim tok bilong papa bilong em na tupela i stat wokabaut i go long bikbus tru.

Mama i wet i go apinun tru, em i lukim tupela i no kam kwik long haus. Em i go long gaden yam gen na i singautim tupela. Tasol tupela i no stap. Mama i singaut strong tru na kolim nem bilong tupela, tasol tupela i go longwe yet. Em i lukluk long mak bilong lek bilong tupela. Em i lukim tupela i go long bus na em i bihainim tupela i go, em i go yet na i tudak pinis, em i singaut long tupela tasol tupela i no bekim maus bilong em. Tupela i harim pinis tasol tupela i no

bekim.

Tupela i harim em i kam klostu liklik na papa i tokim pikinini, mama bilong yu i kam klostu nau olsem na yu tanim na kamap diwai, na mi yet mi tanim kamap snek na i go long hol bilong ston. Tupela i toktok i stap na mama i kam klostu tru, orait pikinini i tanim kamap diwai na i stap na papa i kamap snek na i ronawe i go long hol bilong ston.

Orait, mama i kam painim tupela nogat, nau em i stat long kraik long tupela. Em i no inap painim tupela moa. Nogat. Olsem na em i slip long aninit long dispela diwai inap tulait em i go long ples bilong em.

Dopenu Sawiembe
L.C. Boana



Nem: Ruben T. Gawi
Krismas: 24 (man)
Adres: Emak Holding, PO Box 3530, Lae, Morobe Province
Save laikim: Mekim pen pren, senisim poto i go kam, go lotu, pilai gita na wok mani.

Nem: John Asai
Krismas: 21 year old (male)
Adres: Private Mail Bag, PO Box 859, Kimbe, WNB
Save laikim: Pilai soka, lukim TV, raitim pas, stori wantaim pren na waswas long solwara.

Nem: Cecil Imai
Krismas: 16 (man)
Adres: Private Mail Bag, PO Box 859, Kimbe, WNB
Save laikim: Pilai volibal, soka, lukim TV, go long skul na stadi.

Nem: Belden Jimmy
Krismas: 16 (man)
Adres: C/- Michael Normeng, PO Box 183, Tabubil, Western Province
Save laikim: Lukim EMTV, mekim fani stori, raitim pas, bungim ol nupela pren, waswas long wara, go lotu na harom ol gospel musik.

Nem: Jerry Sepake
Krismas: 17 (man)
Adres: Taurama Forest Industries Limited, Omati Camp, PO Box 184, Port Moresby, NCD
Save laikim: Raun long felosip wantaim ol narapela Kristen, lukluk raun long narapela ples, pilai spot na go long sios.

Nem: Philip Geijom
Krismas: 19 (man)
Adres: C/ LSK, PO Box 850
Save laikim: Pilai soka, pilai volibol, ridim baibel ves, go lotu, lukim TV, stori wantaim ol mangi na meri, senisim ol presens na helpim ol lapun.

Nem: Belden William
Krismas: 19 (man)
Adres: Ulau Community School, PO Box 89, Aitape, Sandaun Province
Save laikim: Go lotu, pilai gita, pilai soka, volibal, basketbal na raun wantaim ol prens.

Nem: Henry Numu
Krismas: 19 (man)
Adres: Vanatung Plantation, PO Box 1966, Rabaul, East New Britain Province
Save laikim: Pilai soka, basketbal, go lotu, pilai gita na harim musik bilong tumbuna studio.

Nem: Rosina Abban
Krismas: 24 (meri)
Adres: Box CT 1533, Cape Coast, Ghana, WA
Save laikim: Ritim buk na waswas.

Nem: Regiana Affel
Krismas: 28 (meri)
Adres: Box CT 1533, Cape Coast, Ghana, WA
Save laikim: Lukim ol so.

Nem: Ebenezer Ekow Laing
Krismas: 24 (man)
Adres: P O Box 142, Cape Coast, Ghana, West Africa.
Save laikim: harim musik, raun lukim nrapela ples na senisim ol presen.

TOK SAVE: Sapos yu laik raitim pas long ol pen pren insait long kantri Ghana, Afrika, Plis yu mas raiti long tok English.



Dia LAIPLAIN,

Mi pilim olsem mi no redi yet long marit tasol papamama bilong mi laik bai mi marit. Mama bilong mi i sik nogut tru na sapos em i dai bai nogat meri long haus husat inap lukautim pik long peim braid prais bilong ol yangpela brata bilong mi na bilong mi yet.

Ol wan skul bilong mi nau i marit pinis na sampela i statim famili bilong ol yet pinis tasol mi no bungim wanpela meri yet husat mi gat laik long en na maritim. Tupela mamapapa nau i tok tupela i no inap wet moa bikos nau mi gat 21 krismas na tu mi kisim gutpela wok mani. Tupela i laik painim wanpela meri bilong mi na baim braid prais tasol tupela i no laik kisim tok orait long mi pastaim.

INOREDI YET

Dia PREN,

Yu gat wanpela bikpela hevi tru long lukim. I gutpela sapos yu sindaun wantaim papamama bilong yu na narapela wantok. Planti kastom long ples i save tok papamama o wantok bai stretim marit tasol taim i senis na planti ol lapun na bikman bilong ples bai luksave long wanem kain hevi yu gat na dispela marit i no inap wok gut taim na yu no inap amamas

Mi les long papamama painim meri bilong mi

sapos yu pilim olsem yu no redi yet long marit.

Wanpela man i no inap pusim o subim yu long marit. Mama lo bilong PNG i no inap oraitim dispela kain pasin. Ating pasto, pater, nes, tisa o wanpela welfea opisa inap helpim yu na sindaun stretim toktok wantaim ol papamama bilong yu.

Painim meri bilong yu yet em pasin bilong ol waitman na taim ol waitman i mekim olsem, em i gutpela tru. Tasol dispela tu i no wanpela gutpela wei bilong marit. I gutpela sapos yu stadim na skelim ol kastom bilong ples pastaim. Traim painim aut bilon g wanem na ol dispela kastom i stap na ol pipel bilong yu i laik holim ol dispela kastom yet.

Yu mas save olsem i gat gutpela as na ol pipel i save holim ol kastom bilong ples. Marit i no man i joinim meri na pinis long hap.

Marit i save joinim tupela famili na planti arapela pipel na save kisim ol gutpela samting na sampela hatwok i kam insait long laip bilong tupela famili wantaim. Yu noken ting ol famili bilong yu bai mekim olgeta asamting bilong yu. Yu mas bekim na mekim wankain pasin ol famili bilong yu i mekim long yu.

Wanpela gutpela as yu laik painim meri bilong yu em long painim meri husat i save laikim wanem samting yu laikim na mekim ol samting wankain olsem yu. Long ples, olgeta mani save mekim gaden tasol olsem na ol i laikim wanpela samting tasol nau kankain pipel i gat laik long kankain samting.

Wanpela meri bilong ples huisat i no bin go long skul bai painim hat long go long

taun na fit long taun laip we man bilong em i wok. Tasol sapos papamama bilong yu i sindaun wantaim na toktok, ating yupela inap painim wanpela meri husat inap stap gut long tupela sait wantaim.

Yu tok tu olsem ol wan skul bilong yu marit pinis. Sampela bilong ol i maritim meri papamama bilong ol i makim bilong ol o? I bin gat pasin bilong waitman na kastom bilong ples miks tu?

Inap yu toktok long sampela bilong ol dsipeal manmeri nan painim aut wanem samting ol i save long dispela tupela rot bilong painim meri na maritim.

Hevi long sait bilon gpik i stap yet. Papamama bilong yu i laikim yu na laik bai yu helpim ol long sait bilong famili na yu ken lukautim ol brata bilong yu.

Mama bilong yu laikim yupela olgeta mas gat pik na mekim yu pilim amamas.

Sapos yu poainim meri bilong yu yet, ating bai yu no peim wanpela pik long braid prais bilong meri.

Sapos yu mekim olsem tu, ating yu inap putim mani long beng na baim pik long peim braid prais taim yu laik marit o sapos dispela nogat ating yu inap tokim ol narapela manmeri long lukautim pik bilong yu na bai yu inap givim sampela mani samting long ol.

Ol narapela memba bilong famili i ken helpim na givim tingting bilong ol long dispela samting bai tupela papamama i ken skelim na yupela olgeta ken kamap long wanpela tingting na dispela hevi i ken pinis na yu na papamama wantaim i ken amamas long dispela.

LAIPLAIN

CMB na PNGBC kamapim reskyu pekej bilong sevim kopra bisnis

PAPUA Niugini Benking Koporesen na Kopra Maketing Bod i kamap pinis wantaim wanpela reskyu pekej long traim sevim kopra bisnis long kantri we long las yia yet i bin bungim bikpela hevi taim kopra prais long wol maket i stap daunbilu.

Ol bikman long tupela institusen i no tokaut

wanem samting ol i plen long sevim kopra bisnis, tasol wanpela em long kesim gen ol CMB sek we ol i bin peim ol kopra groa stat yet long las yia na ol i save bauns bek Na beng i wok long rijektim ool.

Ekting CMB Manesa Michael Varapik na i bin tokaut long dispela samting bihain long ol toktok we

ol bin holim wantaim ol lain bilong PNGBC.

Mista Yarapik i tok husat groa i holim ol bauns sek i stap i ken kisim i go bek long PNGBC na kesim.

Mista Varapik i kisim ples bilong foma sief eksekutiv bilong CMB James Kiele we CMB

Siaman Jerry Nalau i bin rausim long las wik Januari 2, 2001.

I gat ol ripot i kamap gen we i gat wari olsem ol sevim bilong ol CMB woklain bai bagarap gen bikos manesmen i laik yusim aninit long dispela reskyu pekej.

Strong bilong Kina pundaun moa

STRONG bilong Kina i pundaun i go daun tru na long dispela wik, em bin go daun long .29 toea mak long wanpela Yunaitet Stats dola.

Ripot bilong ANZ beng i bin autim ripot long dispela samting long dispela wik. Insait long 10-pela de stat long Nu Yia i kam inap long nau, mak long strong bilong Kina i wok long go daun na pundaun i go daun long dispela wik em i daunbilu mak insait long tupela yia.

Ol ripot i tok dispela i kamap bihainim ol hatpela kondisen bilong Wol Beng bipo em i givim namba tri hap bilong lon o dinau mani i kam long PNG.

PNG Beng i tok long ol opisel mak, Kina i bin stap long .30 mak long wanpela US dola.

Gavman na Sentrel beng i wok long stap isi long dispela samting.

Sampela ripot i tok insait long wanpela leta i go long Beng Gavana Koiari Tarata, Wol Beng i amamas long pravitaisesen bilong gavman na progres i kamap, tasol PNG i mas inapim tripela kondisen na ol dispela em, PNGBC i mas kamap wantaim gutpela ripot na kamapim gutpela winmani, ol i mas salim ol fainensel aset bilong kampani na rausim ol kain hevi i stap long dispela eria na kantri i mas karimaut komyuniti sevis.

Deputi Oposisen lida Peter Peipul i sutim tok gavman bilong Sir Mekere Morauta long strong bilong Kina i pundaun i go daun moa yet.

Na em i tok Sir Mekere husat ol i apim nem bilong em olsem man i sevia bilong kantri i mas wokim samting nau long stapim Kina i pundaun i go daun moa.

Sir Mekere i tok strong bilong Kina i stap gut tasol em i bihainim ol maket kondisen na olsem em i wok long pundaun na go antap.

"Kina olsem ol arapela karensi i save bihainim rot we long dispela kain taim bilong yia, strong bilong em i save pundaun. Kina em i flout mani na dispela i min olsem em i save bihainim saplai na diman sein.

PNG i mas gat plen long helpim em yet taim oil i kapsait

ROSALYN ALBANIEL i raitim

INSAIT long maritaim histori bilong kantri, PNG i no bin eksperiensim o lukim wanpela bikpela birua we oil i kapsait.

Nesanel Trensport Developmen Plen (NTDP) i bin luksave long dispela na i bin stretim rot long luksave long dispela birua.

Minista bilong Trensport na Sivil Eviesen, Bart Pilemon i bin tokaut long dispela long wanpela plen we dipatmen bilong em i bin tok orait olsem wanpela maritaim plen i mas kamap long we i ken stretim ol dispela kain birua.

Pepa plen i tok maski sapos nogat oil kapsait, em i gutpela long kisim lukaut bikos nogat man i save wanem taim bai birua bilong oil i kamap.

Pepa i tok yumi mas stap redi long kain birua na kamapim ol plen bilong lukautim ol samting bilong si na wara.

Pepa i tok polisi bilong Dipatmen em long mekim bai plen i wok sapos i gat oil i kapsait long PNG na ol dispela polisi bai ol i luksave na

apdetim long kamapim stretpela rot long givim gutpela bekim long dispela birua.

"Long narapela hap bilong wol, ol arapela kantri i bungim bikpela birua long kapsait bilong oil. Dispela i ken kamapim bikpela bagarap long marin laip, ol ston na karanas bilong si, ol pisin bilong si, ol diwai samting i save gro arere long si o wara na ol arere bilong nambis na ol pablik nambis.

Hevi bilong marin trafik olsem ol tenka o sip bilong oil husat i save kam klostu long nambis bilong PNG na long arere bilong Kumul teminel na dispela eksploresen we ol i wok long painim oil na dispela i mekim ol nambis bilong yumi i stap long han bilong birua," Plen pepa i tok.

Wanpela rot long daunim ol birua we rot trenspot i save kamapim antap long envaramen o wara, graun na bus, olgeta trenspot projek bilong antap, graun na wara bai go aninit long wanpela test bilong envaramen o lng luksave long ol samting i save kamap long antap long skai, wara na bus.

Gavana Philemon welkamim ol komplek bilong ol papa bilong Bislama bisnis

MILEN BE Gavana Titus Philemon i welkamim ol komplek we ol risos ona i wokim long ol man ol i makim long stap insait long nupela provinsel Bislama Fiseris Manesmen Komiti.

Mista Philemon i tok em i amamas long lukim olsem ol pipel i wok long luksave olsem dispela komiti i gat bikpela wok long karimaut.

Tasol em i tok ol i no makim ful komiti yet.

Mista Philemon i wok long bekim wanpela wari bilong Mali Gisi bilong Wudlak Ailan na Tobuwabu Towabaku bilong Trobrien Ailan.

Tupela i komplek olsem sampela long ol lain husat ol i makim long komiti em ol i bilong wanpela eria tasol. Na i nogat man i stap long komiti i makim ol papa bilong ol risos long Kiriwina, Wudlak, Esa'ala, Gudinap, Rabaraba na Suau.

Mista Philemon i tok komiti i bin holim namba wan bung bilong em long Desemba na klostu taim long Januari 15, ol bai holim namba tu miting bilong ol.

Em i tok em i luksave olsem ol komiti memba i bilong wanpela eria tasol ol i ken senisim ol sapos provinsel Eksekutiv Kaunsil i oraitim.

Em i tok taim ol toktok i sut long gavman bilong em, ol i mas luksave tu long wok we provinsel gavman em i go pas long en i wokim bikos long namba wan taim, Milen Be i kirapim manesmen komiti lukautim ol risos aninit long menesmen plen we Nesanel Fiseris Atoriti i tok em i gutpela moa winim ol arapela.

Gavana i bin tok ol i makim komiti long holim wok insait long tripela yia, bihainim rivais ekt bilong Nesanel Fiseris tasol Provinsel Eksekutiv Kaunsil i gat rait long mekim na kamapim ol senis long makim intres bilong ol papa bilong ol risos.


Em i tok gavman i gat bikpela tingting long lukautim na manesim bislama risos na ol pipel long provins i ken kisim gutpela samting long en.

Em i tok pastaim planti ausait lain i save go insait long bisnis na ol i kisim ol gutpela samting long en tasol nau gavman bilong em i laik stapim dispela na larim tasol ol asples i wok long dispela bisnis.

Em bin tok em i amamas long tokaut olsem long Desemba 15, Minista bilong Fiseris i rausim pinis tambu we em bin putim long wokim na salim bislama long Milen Be provins.

Dispela em wanpela gutpela samting we gavman bilong mi i kamapim long helpim ol pipel na ol i ken kisim mani long helpim ol i peim ol skul fi bilong ol pikinini bilong ol, na tu baim ol arapela samting bilong amamasim sindaun," Mista Philemon i tok.

Gavana Philemon i tok em i gutpela long lukim olsem ol pipel bilong Milen Be i wok long go insait long wok bilong menesim ol risos bilong ol tasol ol i mas bihainim stretpela rot na i no autim wari bilong ol long ol niuslain na paulim tingting bilong pablik.



Taim bilong nupela senis....

Heni Harry bilong Telikom Rumana i putim ol pinga bilong em long las taim antap long olpela teleks masin. Telikom i wok long rausim ol olpela komyunikesen sevis we bai pinis long las de bilong Februeri long dispela yia. Teleks i bin stat long 1960's na Post na Telegrap i save yusim long salim ol toksave namel long PNG na ovasis. Foto: IVAN BAYAGAU.

PNG BUSINESS - WHO'S WHO - TRADE & SERVICE

MUSIC CASSETTES

Kusai Newly Christmas Release Cassette

KUSAI & FRIENDS-CHRISTMAS 2001
Featuring the Engineers and Friends of Kusai Studios.

- | | |
|--------------------|-----------------|
| 1. Francis Matala | 6. John Morgan |
| 2. Melton Avoke | 7. Brian Matala |
| 3. Richard Nennek | 8. Henry Matu |
| 4. Lawrence Martin | 9. Nick Painai |
| 5. Mickeal Tali | |

Mail order K10 to:
KUSAI STUDIO
P.O. BOX 623, KAVIENG, N.I.P.

COFFEE EXPORT

ARABICAS LTD

Quality Coffee Roasters of PNG

Specialists in:

- PARADISO ORGANIC COFFEE
- BLUEMOUNTAIN COFFEE
- KOPI BILONG YUMI

Other Varieties Available
Mail orders - Welcome
P.O. Box 680, Goroka, EHP

732 1272 or 732 2496 - Fax: 732 2949
email: arabicas@global.net.pg

CHEMICALS

BELLTEK

CHEMICAL MANUFACTURER TO PNG

- | | | |
|--|--|-------------------|
| | | Multi-clean |
| | | Washing Chemicals |
| | | SCRUBBER |
| | | MOPS and BUCKETS |

BELLTEK CHEMICALS LTD.

P.O. Box 2358, Boroko, Papua New Guinea
POM: Ph: 325 7655 Fax: 325 0949 - LAE: Ph: 472 3065 Fax: 472 5829
MT. HAGEN: Ph: 542 1303 Fax: 542 3275
RABAUL: Ph: 982 9027 Fax: 982 9141

HAIR & BEAUTY

EF-KAY PRODUCT CO LTD
Manufacturer & Supplier of hair & beauty products.

- PERM/RELAX SYSTEM
- SHAMPOOS & CONDITIONERS
- PERM/RELAX KITS
- GEL/ACTIVATORS & MOISTURIZERS
- HAIR FOOD & COCONUT OIL
- SPRAYS, LIPSTICKS, NAIL POLISH
- HAIR PIECES/BRAIDS, ROLLERS, CAPES ETC.

We also provide specialized salon services.
Located along Waigani Drive, next to Steamships Hardware, behind City Pharmacy.

P.O. Box 1671, Port Moresby, Papua New Guinea
Ph/Fax: 325 0519/325 3400
Email: efkey.paradise@yahoo.com

INDUSTRIAL RAGS

P.N.G. RAG LTD.

PH: 323 2000 - FAX: 323 4565
Email: pngrag@datec.com.pg

QUALITY INDUSTRIAL RAGS FOR QUALITY JOBS.

Our products come out in seven different materials. These items are available: 5kg, 10kg, 200kg. bag. PNG Rags limited products are free of zips, free of buttons, free of silk. We have got 30,000 kg cut rags ready for delivery anywhere in PNG.

CHEAPEST INDUSTRIAL RAGS IN P.N.G.

Crazy brand new shoes on sale and cheapest in town: men, ladies, children.

"HURRY BEFORE STOCK LAST"

Location: Next to Arnotts Biscuits

MINING EQUIPMENT

Alluvial mining equipment for sale

- Gold dredges, Pro 2inch, Pro 4inch, Pro 6inch & Nat 7inch
- High Banker Combo, Super Metal Detectors
- Sluice & Pans, Gold Wheel, Rock Crusher, Mercury Retort
- Field Service trip, Consultation Service.
- Equipment demonstration every Tuesday and Thursday

CONTACT GOLD PAN
PHONE: 323 6052 FAX: 3252959
P.O.Box 3980, Boroko, NCD

MOTEL

KOKODA TRAIL MOTEL (SOGERI)

16 Family Rooms self contained Bar, Pokies, Restaurant, Conference facilities, BBQ, Swimming Pool.

We cater for Functions, Conferences.
Just 35km from Port Moresby.
Room rate K60.00 per night.
Quote for conference or functions.

P.O. Box 374, WAIGANI NCD.
Ph: 325 4403, 325 4890.

ELECTRONICS

Re-furnished Computer Equipment & Parts
Hicom Electronics Ltd

Council Chamber Building, Hagen Drv.
P.O. Box 468, Mt Hagen, WHP
Phone/Fax: 542 1630,
E-mail: hicom@datec.com.pg

We are dealers of high quality refurbished computers, notebooks, monitors, printers, plotters, etc direct from Australia. We stock hard to find computer parts including main boards, notebook screens, CPU, memory, hard drives, CD-ROM, Sound Cards and many more... We deal with name brands including Compaq, IBM, HP, Toshiba & Dell. We also provide the following Services. Computer Networking (LAN/WAN), Internet Connectivity, Software Sales & Support, AUTOCAD, Mapinfo and Total Station sales & support. For more information please give us a call.

HOTEL

Kavieng Hotel

- 22 Air Conditioned Rooms
- Licensed Restaurant
- Budget Accommodation
- Airport Transfers - Hire Cars
- Cable TV.

Telephone: 984 2199
Facsimile : 984 2283

MOTEL

Hanni's Inn

Experience the newest Comfort in Buka.

- Air Conditioned Self-contained units for privacy
- Fridge & coffee making facilities
- TV equipped with multi-channels
- Restaurant & Tumola Coffee Shop available
- Within the heart of Buka Township

Visiting Buka! Book early!
PHONE: 973 9930

Facsimile: 973 9930
P.O. Box 973, Buka, North Solomons Province.

VACANT

This space could be Yours!

ADMINISTRATION



Fully nationally-owned company operating since 1972, acquiring a considerable body of hands-on experience and administration management knowledge.

We provide:

- Accredited Project Research & Assessment Services
- Services to Resource Owners, Investors/Businessmen
- Business Management Services
- Full Accounting Services
- Information Gathering and Reporting
- Preparation of Management Sales Marketing and Advertising Strategies
- General Services
- Accredited Training Programmes
- Personal Escort and Security

We have successfully completed over 20 projects over a period of 4 years for the IPA

Please feel welcome to contact our office for further information. We look forward to being of service to you.

Hayes & Ekas Limited, P.O. Box 1413, Boroko, NCD.
Phone: 323 4376, 323 4225 - Fax: 323 4546

To advertise in this section, Please Call

WALTER D. EDWARD,

Ph: 325 2500 Fax: 325 2579

Wantok painim Wantok

dispela pes em bilong yupela ol man na meri husat i laik salim tok save i go long ol:-

BUBU KANDERE BRATA SUSAN MISIS PREN PIKININI NA HUSAT MOA YU GAT LAIK LONG SALIM TOK HAMAMAS TOK SORI O TOK PILAI.

Toktok nating i go long lewa. Wanpela samting tasol toktok i kam long dispela Wantok painim Wantok em i mas sotpela ino inap longpela olsem tel bilong kapul dispela toktok nogat pei long en tasol sapos igo antap long tripela lain olsem → Brata pls kam long Port Moresby long dispela wik wantaim tambu lewa bilong yu
 en nau bai i gat pei olsem
 foapela Kina (K4.00) long wanpela hap olsem → Brata pls kam long Port Moresby long dispela wik wantaim tambu lewa bilong yu na pikinini wantaim dog.

Salim dispela toktok i kam long mipela long Wantok Nius na hamamasim husat yu laik long hamamasim. Tingim dispela ino Kanage stori. Makim skin pas olsem -

Wantok Painim Wantok, PO Box 1982, Boroko, NCD

Special Features

are an integral part of news reporting. And at Word Publishing, we do our best to present reports that are fair, informative as well as educational.

If you are celebrating an anniversary, launching a new product or opening a new building, call our supplement Editor or Advertising Manager on:

PHONE: 325 2500 or FAX: 325 2579

**We can cover your
 Business
 in both ENGLISH and PIDGIN!**

Kanage em bilong Kabwum na em wantaim poromeri bilong en tupela i go long Setiko maket long baim sampela kaikai na kumu bilong krismas. Na poro meri bilong em bisi long baim kaikai na kumu i stap long Seiko maket. Kanage em yet em lukluk raun long maket i stap na em lukim ol meri nambis salim ol basket long maket. Em nau yu save Kanage em bus man na i no save long basket. Ol meri nambis salim long Setiko maket. Na Kanage i go klostu long wanpela. Kanage askim long baim basket na abrus na em i tok. Hamas long beksait bilong yu, mi laik baim ya? Na meri nambis ya paul long tok pisin bilong Kanage na Kanage askim gen beksait bilong yu salim long hama ya? Na meri nambis ya lukluk long beksait bilong en i stap. Kanage tok pisin krangi olgeta na meri nambis sekim em yet long beksait i stap. Kanage em tok long basket tasol abrus na em tok beksait bilong yu salim long hama ya. Na hariap tru meri nambis kisim tingting na skelim toktok bilong Kanage na em bikmaus na krosim em. Yu bus kanaka bilong Kabwum handret maunten. Em i no beksait yu mas tok basket. Man, Kanage ya paia bilong en i dai na em i no toktok. Em kisim poro meri bilong em na sem pipia stret na isi tasol tupela-tekov i go long ples.

Buttong Nongcom Bialla

Kanage em bilong Buka na em marit long Mendi, Sauten Hailens provins. Tupela marit i gat wanpela pes bon boi na i kisim skin bilong papa bilong em olsem blak skin. Na paps em yet save wok i go i kam. Meri bilong em save paul wantaim narapela man. Taim man

tru tru i kam bek long fil brek, meri giaman olsem em save stap gut na meri bilong Kanage i gat bel na taim i kam klostu nau. Dispela taim meri bilong em i ringim em long ples bilong wok olsem em bai go klostu long haus sik. Na meri bilong Kanage i gat bel na taim i kam klostu nau. Na paps i tok em bai kam klostu 2-pela de moa iu stap. Em nau taim bilong kam bek na em kam long ples. Dispela taim em go long haus. Em go lukim dispela bebi. na bebi i no olsem skin bilong em o pes bon bilong em na em belhat nogut tru na tokim ol lain tambu bilong en. Ol tambu taim yumi save planim karuka, yumi no save katim kokonas na taim yumi save planim kaukau yumi i no save digim taro. Dispela taim ol tambu bilong em i paul nabaut. Na em tokim ol stret. Mi ting olsem mi bilong Buka na mi ting olsem bebi bai kisim skin bilong mi ya nogat em kamap waitman pikinini stret. Dispela taim ol tambu bilong em i no paul moa na go nabaut.

Peter Rasta Biue Mendi

Kanage em save stap long wanpela ples ol kolim Kaweri na olgeta apinun em save go kaikai long haus bilong kandere man bilong em. Kandere man i tokim em olsem mi bai givim yu mani so yu go karim kopi na go lusim long rot. Kandere tok wan bek em bai K2 yu kisim. Long dispela taim Kanage i nogat wan toea tu long poket bilong em olsem na em laik kisim K10 long wanpela de na karim faivpela bek long sem solda na kisim i go long bik rot stret. Taim em karim i go namel long rot, trangu em pundaun krangi stret na behat bilong em kam klostu na em tok. Wanpela samting long tok Inglis olsem. What the money K10 saking for accident is accident. Taim em tok olsem na kirap kandere man bilong em kam klostu na

tokim Kanage long tok Inglis olsem I'm wrong the coffee beks pundaun and get bagarap. Taim em lap i stap kandere Kanage kirap na tokim em, kandere, this is accident what plari bastet laugh you give it to me. Kanage tok gen olsem long Inglis olsem, my life is not important but my money is very important to play kas long ples Kaweri. Tupela man ya wok long lap na nait bungim tupela long hap.

Phillip Sendex Mendi

Lapun Kanage bilong Baiso taun ya. Em wanpela bod siaman bilong skul tasol em i no save gut long tok Inglis. Wanpela Mande gutpela san i kamap na em waswas bilas na go long skul long lukim hetmasta na stori wantaim em stap. I no long taim hetmasta kirap na tokim Kanage. "Orait Kanage, inap yu go tokim ol mamapapa husat i no peim skul fi bilong pikinini bilong ol. Kanage kirap na wokabaut i go stret long Kokianaie kemp long eastrip graun. Kanage go kamap long haus bilong wantok bilong em na tokim em. Hey wantok, everybody laikim dadi tomomos come to my papis. Trangu wantok paul na Kanage ronawe.

Kaiga M. Po'o Baimuru

Kanage bilong Buka long Not Solomon provins tasol em i stap long Goroka na wok olsem wanpela pablik sevan. Wanpela potnait Fraide em i tingting, long painim danis o disko. Em i go na spak long pablik ba long Bird of Paradise Hotel. Boi Kanage i spak gut stret. Em i hotim skin gut tru long bia. Em nau em i go long painim danis long ples klostu long Wara Kepamu. Em nau Kanage i stap long disko haus long Wara Kepamu. Em i givim danis i stap tu

boi i hangrere long kaikai bia tasol em i no save olsem ol i salim bia long ples bilong danis. Em i askim wanpela mangi long ples sapos ol i salim bia long ples bilong danis na mangi tokim Kanage. Man, ol i salim bia hia. Mani i kam na mi go baim bia bilong yu. Kanage putim han bilong em i go insait long poket long kisim mani tasol abrus na em rausim raba. Kanage em wanem samting yu givim mi. Kanage givim raba long em na em yet tekov.

Alphonse Sakin Hohola

Kanage bilong Raikos Madang na em wantaim misis bilong em tupela i go long Fox taun. Yu save Kanage em man bilong ples olsem na em i laik save long biutiful Madang. Tupela i go long Yomba Treding Stua na long stua ol pilaim keset bilong Wali Hits na wanpela singsing ol i kolim prensip. Kanage em harim olsem em smail na tokim Misis long singsing na ol singim prensip. Na Misis bilong em tokim Kanage olsem em i orait. Yu ken painim wok man em tok olsem em tekov i go long ples tasol Kanage tingim i go na em tokim meri bilong em olsem. Em i orait yu ken go tasol noken lus tingting tumas long mi. Olgeta samting yu karim i go tasol wanpela samting em yu laik karim i go em lewa bilong mi. Na wanpela stua kipa meri tokim Kanage. Olsem what are you doing Kanage na Kanage em bekim. No this one my meri lewa ya i laik lusim mi so I'm laiking about her na stua kipa meri tokim em. Kanage na meri bilong en. Yu ken go tasol na kam salim tingting. Dispela em biutiful Madang. Em tokim meri ya olsem em tekov i go pinis.

Buttong Nongcom Bialla

Kanage em sigirap long marit na ol lain bilong Kanage bungim pe na maritim meri lalibu. Kanage em bilong Tambul na Kanage i no save go long haus o helpim meri. Meri i no kisim amamas. Olsem na em go komplem long kaunsil long pasin bilong Kanage. Kaunsil i sori long meri na givim wanpela skul toktok long Kanage. Dispela taim Kanage helpim meri na wokim wok na slip long haus wantaim meri lalibu. Wanpela de o nait i no abrus. Meri i les pinis long bihainim bilong Kanage. Tupela go waswas long wara Kagol meri kisim wanpela blakpela raunpela ston na tromoi long wara. Kanage i wari nogut tru na bihainim i go, em krai nogut, ai tu ret, na nek i pas. Kanage go kamap long ples kaunsil na sampela man waswas i stap. Kanage i tok yupela lukim amamas bilong mi kisim i kam o nogat. Meri lalibu tromoi long wara. Lap spakim ol lain pinis. Kaunsil i tok em bai hat long lus o pundaun. Go bek na sekim gen. Kanage ron olsem Muruk Das i kirap

Vincent Rex Kupasen Mt Hagen

Kanage em bilong Sepik. Wanpela Fraide Kanage go raun long Wewak taun. Kanage raun i go na pispis kilim em nogut tru. Boi ros hariap tasol long painim pablik toilet long rausim wara tasol em i no painim toilet na em pilim klostu bai pispis i ron long trausis. Kanage kirap tasol em pispis long as bilong wanpela pawa pos. Ol manmeri lukim em na ol singaut long em olsem. Kanage this is against the law. Kanage kirap tromoi tok this is against the post. Ol manmeri harim na ol singaut, poro yu rait man with the wrong mind.

Maco Saus Wewak



NCD PUBLIC SERVANTS OFF-SEASON SOCCER

Round 6

Saturday, January 13, 2001.

Bisini 1

08.00am	M2	Air Niugini vs PNGBC
09.05am	W2	Air Niugini vs PNGBC
10.10am	M2	1PIR vs POSF
11.15am	W2	1PIR vs POSF
12.20pm	W2	BPNG vs DCA
01.25pm	M2	BPNG vs DCA

Bisini 2

08.00am	M1	Police vs Health
09.05am	W1	Police vs Health
10.10am	W1	NSO vs Naqia
11.15am	M1	NSO vs Naqia
12.20pm	W1	A/General vs Education
01.25pm	W1	A/General vs Education

Sunday, January 14, 2001.

Bisini 1

08.00am	M2	N/Parliament vs Defence
09.05am	W2	N/Parliament vs Defence
10.10am	M2	Post PNG vs NCD
11.15am	W2	Post PNG vs NCD
12.20pm	W2	Works vs UPNG
01.20pm	M2	Works vs UPNG
02.30pm	M2	Teachers vs Telkom

Bisini 2

08.00am	M1	Transport vs IRC
09.05am	W1	Transport vs IRC
10.10am	W1	Cellnet vs Harbours
11.15am	M1	Cellnet vs Harbours
12.20pm	M1	NPF vs Commerce
01.20pm	W1	Fisheries vs NBC
02.30pm	M1	Fisheries vs NBC

Bye: Pool 1 Ecom (men/women), NPF (Women)
Pool 1 (men/women), Telkom (Women)

Calendar of events for the Coca-Cola Lae Corporate Touch Competition in 2001

April 2001 - Easter Long Weekend
Coca-Cola Inter-City Cup - Lae

May - September 2001
Coca-Cola Corporate Touch Mixed
Competition - Lae

September 2001 -
Independence long weekend
PNG Touch Federation - U/18
Championships - Madang
PNG Touch Federation - Open's
Championships - Madang

November 2001
Coca-Cola Corporate Touch 5 A Side Supa
Challenge - Lae

December 2001
PNG Touch Federation Masters
Championships - Goroka

DRAW FOR THE 2001 OFC CLUB CHAMPIONSHIP

LLOYD ROBSON STADIUM
PORT MORESBY, PAPUA NEW GUINEA
9TH-22TH JANUARY 2001
(REVISED KICK OF TIMES)

Group A

Teams

Wollongong Wolves	(Australia)
Foodtown Warriors	(Fiji)
Napier City Rovers	(New Zealand)
Unitech FC	(Papua New Guinea)
Laugu United FC	(Solomon Islands)
Lotoha'apai FC	(Tonga)

Tuesday 9th January 2001

1.30pm	Lotoha'apai FC (Tonga)	vs	Wollongong Wolves (Australia)
3.30pm	Foodtown Warriors (Fiji)	vs	Laugu United FC (Solomon Islands)
5.30pm	Unitech FC (PNG)	vs	Napier City Rovers (New Zealand)

Thursday 11th January 2001

1.30pm	Napier City Rovers (NZealand)	vs	Laugu United FC (Solomon Islands)
3.30pm	Unitech FC (PNG)	vs	Lotoha'apai FC (Tonga)
5.30pm	Wollongong Wolves (Australia)	vs	Foodtown Warriors (Fiji)

Saturday 13th January 2001

1.30pm	Foodtown Warriors (Fiji)	vs	Unitech FC (PNG)
3.30pm	Lotoha'apai FC (Tonga)	vs	Napier City Rovers (New Zealand)
5.30pm	Laugu United FC (Sol. Island)	vs	Wollongong Wolves (Australia)

Monday 15th January 2001.

1.30pm	Foodtown Warriors (Fiji)	vs	Napier City Rovers (New Zealand)
3.30pm	Wollongong Wolves (Australia)	vs	Unitech FC (Papua New Guinea)
5.30pm	Laugu United (Sol. Islands)	vs	Lotoha'apai FC (Tonga)

Wednesday 17th January 2001.

1.30pm	Unitech FC (PNG)	vs	Laugu United FC (Sol. Islands)
3.30pm	Lotoha'apai FC (Tonga)	vs	Foodtown Warriors (Fiji)
5.30pm	Napier City Rovers (NZealand)	vs	Wollongong Wolves (Australia)

Group B

Teams

Pansa FC	(American Samoa)
Tupapa FC	(Cook Islands)
Titavi FC	(Samoa)
AS Venus	(Tahiti)
Tafea FC	(Vanuatu)

Wednesday 10th January 2001.

3.00pm	AS Venus (Tahiti)	vs	Pansa FC (American Samoa)
5.00pm	Tafea FC (Vanuatu)	vs	Titavi FC (Samoa)

Bye: Tupapa FC (Cook Islands)

Friday 12th January 2001.

3.00pm	Titavi FC (Samoa)	vs	AS Venus (Tahiti)
5.00pm	Pansa FC (A/Samoa)	vs	Tupapa FC (Cook Islands)

Bye: Tafea FC (Vanuatu)

Sunday 14th January 2001.

3.00pm	Tafea FC (Vanuatu)	vs	Pansa FC (American Samoa)
5.00pm	AS Venus (Tahiti)	vs	Tupapa FC (Cook Islands)

Bye: Titavi FC (Samoa)

Tuesday 16th January 2001.

3.00pm	Tupapa FC (C/Islands)	vs	Tafea FC (Vanuatu)
5.00pm	Pansa FC (A/Samoa)	vs	Titavi FC (Samoa)

Bye: AS Venus (Tahiti)

Thursday 18th January 2001.

3.00pm	Titavi FC (Samoa)	vs	Tupapa FC (Cook Islands)
5.00pm	Tafea FC (Vanuata)	vs	AS Venus (Tahiti)

Bye: Pansa FC (American Samoa)

Semi-Finals


Saturday 20th January 2001.

TBA	1st Semi-Final	Winner Group A	vs	Runner Up Group B
TBA	2nd Semi-Final	Winner Group B	vs	Runner Up Group A

3rd/4th Playoff/Finals

Monday 22nd January 2001.

TBA	3rd/4th Play-Off	Loser 1st Semi-Final	vs	Loser 2nd Semi-Final
TBA	Final	Winner 1st Semi-Final	vs	Winner 2nd Semi-Final



• Allan Lepani i traim hat long stapim bal long ol Fudtaun Waria pila-
ia long trail pilal long las Sande. Fiji i bin winim PNG Anda 20 sait
wantaim 1-0 skoa.



WANTOK SPOT



OFC boss sapotim PNG long holim tonamen

HENRY MORABANG
i raitim

PRESIDEN bilong Osenia Futbal Konfederesen (OFC) Basil Scarsella i sapotim Pot Mosbi long holim Osenia kwalifaia bilong Wol klab sempionsip we i wok long kamap nau long kantri.

Mista Scarsella i mekim dispela toktok bihain long ripot i kamap long Australia olsem olgeta wok redi bilong OFC klab sempionsip long Pot Mosbi i no kamap gut. Ripot ya i tok olsem soka fil i no gutpela, lait bilong pilai i no strong na tu haus slip bilong ol pilai long Yunivesiti ov Papua Niugini i bagarap tru.

Presiden bilong OFC husat i hetman bilong Soka Australia i tok olsem wok developmen bilong soka i bikpela long Saut Pasifik. Na hevi bilong haus

samting em i no bikpela samting long Pot Mosbi.

"Yu i no inap developim soka long rijen sapos yu no pilai kwaliti futbal long hia," em i tok.

"Bikpela aidia his em long serim ol soka tonamen namel long ol soka kantri husat i fomim OFC. Na em i toktok strong olsem i no gat plen long surikim gem i go long Brisben tasol i gat tingting long surikim gem long Lae," Mista Scarsella i tok.

Siaman bilong PNG Ogenaising Komiti Charles Lepani i tok olsem toktok bilong tonamen i raus long Pot Mosbi i no tru. Na em i toktok strong olsem ripot i bagarapim nem bilong komiti bilong em olsem clown i no gutpela.

Em i tok ol lain i kirapim dispela toktok senisim ples em tingting bilong ol. Komiti bilong em i nogat tingting long mekim dispela.

"Australia na Nu Silan em ol gutpela lain stret long mekim kainkain ol toktok olsem. Dispela ol toktok i kamap bikos tupela kantri ya i no laik pilai long Papua Niugini.

Wanpela ripot i kamap long Australian niuspepa i tok olsem sempion tim bilong Nu Silan Napier City Rovers i wari long nogat sekyuriti bihain long gem, na sampela ol pilai i nogat rait long pilai, na haus slip na lait i no strong tumas na i mekim ol opisel i tingting long senisim ples pilai.

Mista Lepani i tokaut olsem toktok bilong haus slip em hevi bilong wanwan kantri, na i no wari bilong ol komiti. OFC i givim wanwan kantri bikpela mani long baim haus slip na em i wari bilong ol.

Em i tok em i no gat wari long sekyuriti bikos OFC na PNGFA i gat fultaim sekyuriti

olsem plisman na tu praivet sekyuriti kampani i lukautim ol pilai na opisel long taim bilong gem.

Insait long arapela stori, wanpela soka sapota Peter Bongoro i askim tupela klab, Napier City Rovers na Wollongong Wolves long tok sore long toktok i rabisim wok bilong PNGFA Ogenaising komiti.

Bongoro i askim OFC long mekim save long dispela tupela klab long bagarapim hatwok bilong komiti na tu bagarapim gut nem bilong soka long Papua Niugini.

Em i tok Australia na Nu Silan i gat sem pasin long bagarapim ol liklik Pasifik Ailan kantri sapos ol i winim rait long holim ol rijonel soka sempionsip o ol arapela bikpela soka resis long rijen.

NCD PUBLIC SERVANTS OFF-SEASON SOCCER

Round 6
Saturday, January 13, 2001.

Bisini 1

08.00am M2 Air Niugini vs PNGBC
09.05am W2 Air Niugini vs PNGBC
10.10am M2 1PIR vs POSF
11.15am W2 1PIR vs POSF
12.20pm W2 BPNG vs DCA
01.25pm M2 BPNG vs DCA

Bisini 2

08.00am M1 Police vs Health
09.05am W1 Police vs Health
10.10am W1 NSO vs Naqia
11.15am M1 NSO vs Naqia
12.20pm W1 A/General vs Education
01.25pm W1 A/General vs Education

Sunday, January 14, 2001.

Bisini 1

08.00am M2 N/Parliament vs Defence
09.05am W2 N/Parliament vs Defence
10.10am M2 Post PNG vs NCD
11.15am W2 Post PNG vs NCDC
12.20pm W2 Works vs UPNG
01.20pm M2 Works vs UPNG
02.30pm M2 Teachers vs Telikom

Bisini 2

08.00am M1 Transport vs IRC
09.05am W1 Transport vs IRC
10.10am W1 Cellnet vs Harbours
11.15am M1 Cellnet vs Harbours
12.20pm M1 NPF vs Commerce
01.20pm W1 Fisheries vs NBC
02.30pm M1 Fisheries vs NBC

Bye: Pool 1

Elcom (men/women), NPF (Women)

Pool 1 (men/women), Telikom (Women)



Tafea bilong Vanuatu winim isi gem

SEMPION klab bilong Vanuatu, Tafea i soim bikpela laik tru long Wol klab sempionsip taim ol i nekim stret sempion bilong Samoa, Titavi, 5-1, long las gem bilong Pul B long Llyod Robson oval aste nait.

Dispela gem i kamap gut tru tasol bikpela ren i bagarapim stail bilong tupela tim wantaim.

Kepten bilong Vanuatu Noel Vari i tokim Wantok olsem em i amamas long boi bilong em i winim tri poin. Em i tok ol boi inap pilai gut tasol ren tasol i bagarapim gem plen bilong ol.

Em i tok olsem em bai yusim wanpela fomesen gen long narapela gem bilong em long Sande.

Gem namel long tupela tim, Tafea na Titavi i kamap strong tru. Insait long 10 minit bilong pilai, nogat wanpela skoa i kamap bikos tupela tim wantaim i painim hat tru long skorim poin.

Pilai i wok long go kam inap long 20 minit, na ol boi Tafea i brukim kiau. Dispela namba wan gol bilong Tafea i kamap yet long lep winga Moses Poeta. Boi ros ya i kisim gutpela bal i kam long kepten Noel Vari na trikim tripela fulbek bilong Titavi na skoa.

Bihain long 15 minit, Poeta i skorim namba tu gol. Dispela gol i kamap long wankain stail we em i kisim gutpela sapot pilai long kepten Vari husat i setim em na em i skorim gol.

Arapela straika Richard Iwai i gat sans long skoa tasol ol i banisim em gut. Orait em i wok long pilai strong na fulbek bilong Samoa i takolim em na referi i givim fri kik long em.

Kepten Noel Vari i kisim na giamanim golkipa na pusim bal isi i go insait long umben bilong em. Skoa nau bilong Vanuatu i sanap 3-0.

Insait long namba tu hap, ol i pilai strong tru na Vanuatu i skorim namba foa gol bilong ol. Gol ya i kam long stail mangi yet, Poeta. Em i giamanim ol fulbek bilong Samoa na givim wanpela gutwan i go aninit long han bilong golkipa na go pas long umben.

Dispela i surikim skoa bilong Vanuatu i go long 4-0

Tasol ol Samoa i luk sotwin na kosa i mekim sampela senis. Dispela senis bilong ol i karim kaikai taim straika bilong ol i pairapim umben bilong Vanuatu. Skoa nau i luk gutpela wantaim dispela skoa 4-1.



Kepten bilong Klunga Tigers i traim save bilong em long Op-sisen resis las wiken.

Gutpela Pis tru bilong PNG... Em DIANA!

PROUDLY



- Tuna kam long solwara bilong Papua Niugini Stret.
- 100% tuna mit stret, nogat bun na nogat skin.
- Planti mit istap long olgeta tin.
- Nambawan tru long kisim protein bilong buildim masol. Em i gat Vaitamen D. na Selenium bilong helpim yu long rausim na pait long sik kensa na ol sik bilong lewa.
- Prais inap tru long yu baim.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.